


**SONGREGIPANI
SONGREANI
(NOKSA GNANG)**





2.76

IONOCRECIPIAMI SONCREANI

NOKSA CHANG

THE DESIGN


WILLIAM T. KEMP

1952

PRINTED

CHRISTIAN STEAMERS COMPANY

London, England



SONGREGIPANI SONGREANI
(NOKSA GNANG)

John Bunyan

Translated by
Wilson K. Marak

4,000/1971

First Edition

Published by

CHRISTIAN LITERATURE CENTRE

Panbazar, Gauhati-1, (Assam)

SONGREGIPANI SONGREANI
(NOKSA GANCI)

John Buxton

Translated by

Wilson K. Mack

ACKNOWLEDGEMENT

E. L. D. Calcutta— Permission for Translation
Moody Press— for Copyright Permission.

Printed by

AJANTA PRESS

S. C. Road, Athgaon

GAUHATI—I

MESOKCHENGANI

Englandni raja James II ni sason ka'ani somoio John Bunyan (1628-88) Protestant ma'malni skiprakgipa, niamgri tom'anirangko dakani gimin aro Church of England-ni skiako ja'rikjani gimin rim'ako man'aha. Ua ja'rikna jechakon ua Bedford patoko donatako man'aha.

Ua bebe ra'atangna duk chakna kusi ong'achim. Ua an'tangni somoiko Isolni Kattako poraina koros ka'achi, uni janggi tanganiko teng'suatbate rasong ong'batataha. Uni jik aro dedrangoni ekgrikatako man'na una "be'enoniko grengrangko bikote gala gita" ong'oba aro ua uamangni dukrangko chakanirangko knae begop-nasipila gita ong'achim. Indakgipa jrimbegipa a'selrang ong'oba ua Isolko am'angkuna kimkim gisiktangko rakkiaha.

Uni "Singhoni a'kol" ine minggipa biapo
ua dongna nangon ua uni dolrang jerangan Gitelo
uni dedrang ong'achim, uamangna kapakachim. Uni
bebe ra'aniko mangrakatbatna ine ua indake
seaha :—

"Jumango anga toe skianiko nikaha
Songregipani rasongona songreani gimin
Bang'bearangko angni nikako.
Anga kattaona donskaaha.
Hajalrangna bate angni mukutona re'baaha.
Aro uarang bang'batroroe
Wal'misirang gita uarang bilachim."

larangni biteara a'gilsako mingsingbatsrang-
gipa toe skiani "Songregipani Songreani"—ko
seaha, jedakode dambe aro budepana kusi ong'na
skianiko man'china ia golpo gitichamko setaiani
ong'a.

A'gilsakni a'bimandu loljol anga re'jojoe
romitingo, anga rong'kol donggipa biap damsiona
sokeaha. Rong'kolo anga tusiengon anga jumang
mingsako nikaha.



Ua mande ba'ra suriko gane, noktangchi
janggalate, jako ki'tap aro janggilo boja gnang

chadengengachim. (Isa. 64 : 6.) Ki'tapko oprake uni poraiako anga nikengachim. Poraimitingo ua be'en moe grapaha. Ua duktanko domon ka'na man'jae, ua skimbeani ku'rangchi chrike "Anga da'o maikon dakginok !" (Mat. 2 : 37) ine grap-engachim.



Janggilo boja gnggipa mandeko nika.

la namjabegipa obostao ua noktangchi re'angaha. Uni jik aro dedrangna uni jajrenganiko uiatna nangnikjachim, aro indake ua duktangko donnuna jotton ka'ahaoba, ua an'tangko rakkirik-na man'jae, ua bon'chotao ka'tongko oprake indake aganaha, "Angni ka'sara jik aro dedrang, angni janggilo donggipa bojani sinjetanio anga namen duk man'enga. An'chingni songjinmako Salgioni wa'al ga'akdape kamgen ine angna aganaha. la gimanasiaoni an'ching joke katna chol ong'ja-ode an'ching pilakan kamgopako man'e sitokginok."

Uni jikgipa aro dedrang aiao inmanbee kengokaha, uko bebe ra'e ong'ja, indiba ua gisiktangko gimaatenga ine chanchiachim. Walgimik name tusiachi uni gisikko namatpilkuna ka'donge, uamang uko tusichina didiaha.

Walba una Sal gitan saknaani ong'aiachim. Uni gisiko inditan jajaani ong'ahani gimin tusinan mikgil re'jachim. Ua walko rang'spite aro mikchi ga'akesan re'ataiaha. Pringo uni jikgipa aro



Ua tusiksake tusinan man'ja.

dedrang ua maikai ong'enga ine sing'na re'baoa ua indake aganaha, "Walan Salna bate namjabata." Indake ua salgipino agangipa kenaniko janaptaiaha, indiba uamang knachakjachim, batesa uamang uko chonike manengaha aro saksaba uni kattarangko knachakjachim.

Ua ia ka'saninggija jakkalanirangko chakchike kuturichi napangaha. Ua an'tangni rasong griani gimin skimoba aro uni ma'drangni bewalrangko nike duk ong'oba uamangna ka'sachakchina Isolo bi'chakaha.

Adita salrangna ua a'barango, gisepo ki'tapko poraie, aro gisepo bi'e re'jojoachim, indiba ua namen jajrengbatroroaha. Ua poraie indake chrikaha, "Jokna anga maiko dakna nanga." Indake chrike ua katna am'enggipa gita uchiko ichiko niwilwalengachim. Indiba ua batchi re'gen jajae, tom'tom chadengkuaha.



Duk ong'bee ua abao re'jojoa.

Anga jumango nikaha, saksa Procharok
minggipa uona re'bae sing'aha, "Na'a maina

chrika ?” Ua aganchake inaha, “Skigipa, ia ki-tapo anga sina nanga ine poraiaha aro angni simanoba bichalo chadengna nangkugen. Anga sina sikja aro bichalo chadengnaba pa’ja.” Procharok sing’aha, “Nang’ni janggi dukan gapani gimin na’a maina sina sikja ?” Kristian aganchakaha “Anga sina kena ; maina anga goprmoni Norokona, ia angni janggilo donggipa bojani jrimani giminan ga’akonanggen.” Procharok sing’kue inaha, “Na’a inditan neng’anio ong’ode na’a iano maina dongkuenga,” Kristian aganchake inaha, “Anga banona re’gen ukon uija.” Unon Procharok una lekka dol’ako on’aha aro uano indake sea gnanchim. “Re’banasigipa Ka’onangaoni katbo !” (Mat. 3 : 7.) Ua segipa kattarangko nikon ua Procharokchi an’pile sing’aha, “Anga batchi katgen ?” Procharok jaktangko bakrachi pakna snilate aganaha, “Na’a apchongipa cholgugako nikatama ?” “Nikatja.” ine Kristian aganchakaha. Unon Procharok sing’taie inaha, “Ua ching’enggipa seng’ako nikatama ?”



Procharok apchongipa cholgugachiko mesokata.

“Anga teng’sugipako nikata gita nika.” ine Kristian aganaha. Unon Procharok agantaie inaha, “Ua sengaona tongtong re’angaibo ; unon na’a cholgugako nikegen. Cholgugako doktikon na’a nang’ni dakna nangako uigen.

Jumango anga nikaha, ua mande Procharokko manie bakan katangna a·bachengaha. Ua katang-srapkujaon uni jikgipa aro dedrang uko nokona re·bapilchina okamrikaha. Indiba ua mande nachikkolrangko jaksirangchi rim·penge, grape, "Janggi, Janggi, Jringjrotni Janggi!" ine chrike katanguaha. Ua bakrani jatchi joljol nipilgija, songjinmaoni katangaha.

Noksulrang uni indake katangako nikon, mitam una ka·dingstekna a·bachengaha, mitam ka·mikkenataha aro gipinranga re·bapilchina okamrikengachim. Uamangoni sakgni uko rim-drabana miksongaha. Uamangoni saksako Skatang aro sakgipinko Jola mingachim. Kristian (uni bimumngo indaken mingachim) uamangko sing'e inaha, "Ka·sara noksulrang, na·simang angko maina ja·rikbaenga?"

Uamang aganchake inaha, "Nang·ko rimpil-na chinga re·baaha." Ua aganchake inaha, "Indake ong·na man·jawa. Nasimangba angni atchiram Gimangni Songjinmaon songdonga aro ukode tappra changpile kamginok. Na·simangba uanon dongkuode gimaatako man·chongmotgen. Uni gimin angmung re·bapabo.



Jola aro Skatang uko rikanga.

Skatang sing'e inaha, "Na'a maiko agana ? An'ching ripengrangko aro sukrangko galgenma ?" Kristian aganchake inaha, "Oe, na'simang indake dakako anga nangnika. Angni am'enggipa baksa na'simangni ripengrang aro sukrangko tosusaode uarangara mamungba ong'srangja. Na'simang angmung re'baode aro kimkim dongode angni dakarang pilakkon man'pagen." Skatang sing'e inaha, "Pilak a'gilsaknirangko watgale nang'ni am'enggipara maia ?" Kristian aganchake inaha, "Cham'gijagipa, marang grigipa aro gimagijagipa man'rikaniko anga am'a (1 peter 1 : 4.) Uko Salgio name rakkienga. Bimchipe am'giparang uko man'gen. Ia Ki'tapko poraibo, unon na'a ma'sigen." Skatang sing'taie inaha, "Nang'ni Ki'tapko galatbo. Na'a chingmung re'pilama re'piljawa ?" Kristian aganchake inaha, "Indake mamung saloba ong'na amja. Anga nanggrio jakko rim'manaha aro anga re'piljawaha." Skatang Jolana agane inaha, "Atcha Jola, ua griba an'chingde re'pilaiginok. Ia pagla mamung orto gri kattarangkosan aganaia. Ua an'tangkosan gisik seng'a aro bigita pilakba ong'ja ine chanchia."

Indiba Jola aganchakaha, "Una ka'dingstek-nabe. Ua namgipa mandean ong'a. Uni aganarang kakket ong'bebeode anga unbaksa re'na nanga ine chanchia." Skatang Jolani kattarangna mitchie aganaha, "Mai, gokaba batbaengama ! Angmung re'bapaon nang'na nambata. Ua nang'ko banona dilangenga ukoba sawa uia. Re'bapilbo goka ong'panabe." Kristian uamangna aganchake inaha, "Uko re'pilna aganpanabe. Batesa na'simang sakgnian angmung re'bapabo. Angni agangipa rasong aro kusi ong'anirang bebe ong'chongmota. Na'simang bebe ra'jaode ia Ki'tapko maina poraija ? Iani katta mingprakan bebe ong'a ; maina iako segipa uni an'chichian soi ka'aha." Jola Skatangna aganaha, "Ka'sara noksul, anga ia namgipa mande baksa re'pae unbaksan duk chakpagen." Unon ua Kristianchi an'pile inaha, "Namgipa noksul, nang'ni am'gipa biapko na'a uiama ?" Kristian aganchake inaha, "Procharok minggipa saksa, ua apchon'gipa cholguga, ia bakraoni nalsaogipako angna mesokataha. An'ching uanona sokeon maiko dakna nangkua uko ge'et-

gen." Jola agane inaha, "Nambea, hai re'chakat-naha."



Skatang Kristianko pagla minga.

Skatang ka'onanga gnang agane inaha,
"Paglarangko angade ja'rikjawa ; noktangchin
re'pilnaka."

Anga ja'mano nikaha je, Kristian aro Jola ka'sne bakra gita re'chakate agangrikjoljolangeng-achim. Kristian :- "Ka'sara Jola, na'a angko knachake re'bapaahani gimin anga kusi ong'a. Skatangba bilko aro niggijagipa kenbeanirangko an'ching gita uipaode ua nengrae an'chingko watangjawachim, Jola :- "Ka'sara Kristian, da'o na'a aro angasanahani gimin an'chingni re'enggipa biapni gimin aro uano an'ching maikai kusi ong-gen uko tale aganpabomo." Kristian :- "Anga uko talatana bate an'tangsa uibata, indiba na'a uko nangnikahani gimin ia Kitapko nang'na poraie on'gen." Jola :- "Atcha, ia Kitaponi katta mingantian bebe ong'a ine na'a chanchiama ?" Kristian :- "Oe, kakket chong'mot Ua Kitapko segipan tol'na man'gijagipa ong'a" Jola :- "Indide uano maiko seachim aganpabo." Kristian :- "Uano bon'changgijagipa gnan, jeon Sia napna man'ja, Uano an'ching jringjrotna dongkamgen." Jola :- "Aro mai gnanpiti ?" Kristian :- "An'chingna rasongni mukutko on'gen aro Sal gita ching-atgipa ganding chindingko on'gen," Jola :- "Aiao inmanani ! aro maipiti ?"



Jola aro Kristian re'chakate agangrika,

Kristian :- "Uano mamung duk dongja aro pilakba grapjawa. Gitel an'tangan an'chingni mikchiko u'sitgen." (Para. 21 : 4) Jola :- "Sawarang an'chingni roringiparang ong'gen ?" Kristian:—"Uamanga Salgini janggi gnanggiparang,

jerangni teng'suara an'chingni mikronrangko mikbrapatpila. Hajalni hajal an'chingna skang re'angsogipa manderangko an'ching grongegen. Uano sakantian ka'tong rongtalgipa aro ka'saan gaggipa ong'a. Ua biapni bang'a gisik gnang-giparang Gitelna bamani gimin a'gilsako bang'a dukrangko chakgiparang ong'a, mitamrang den-kningako man'giparang, mitamranga so'ako man'giparang, mitamrang sripe siatako man'giparang aro gipinranga chike cha'china matburung-rangna on'galako man'giparang ong'achim. Da'o uamang sigijanichi ganat chinatako man'aha," Jola :- "Nang'ni kattarang angko ka'tong mopile an'saoata. Indiba iarang pilakko an'ching maikai jakkalgen?" Kristian :- "Gitel ia Ki'tapko seaha je, an'ching uarangko nangnikode Ua indinan on'gen." Jola :- "Ia pilakko knana anga kusi ong'bea. Hai da'ode an'ching uanona sokningna skele re'naha." Anga jumango nikaha, uamang Ka'donga grini A'beloni sepangbate sokbaaha.



Uamang A'belo gpua,

Agangrikao gisik nange aro ramana sim-
sakjae, uamang rang'san Ka'donga Grini a'belona
gipuangaha. Ua chibolo uamang a'miteko



Kristian ong'katna man'ja.

romromengachim. Janggaloni boja jrimani gimin Kristian sripangna a'bachengaha. Jola sing'e inaha, "la a'koloni maikai an'chingara ong'katginok ? Kristian :—"Chong'mot, angade uijajokke !" Jola uni aganchakanina gisiko namnikjae, ka'onange aganaha, "lan nang'ni aganenggipa kusi ong'ani-rangma ? A'bachengaonin indita namjaode, songreani bon'kamaode an'chingna maian dongso-enggen, sawa uisoa ! Anga ianoni maibakai tange ong'katpilna man'ode uan namginokchim ! Unode ua namgipa a'kingko na'a saksan man'rik-china nang'ko saksan galangaiginokchim !"

la kattarangko agane ua an'pilaha aro krengprete jotton ka'engachim. Jola jenten jokpile, ua a'koloni ong'kate noktangchinan re'angpilaha. Kristian uko niktaijajok.

Unon da'nang Kristiande saksan ua chibolon romromengachim aro apchangket cholgugachipak sepangbatbachina an'tangko jitroraengengachim. Indiba uni janggalogipa bojani gimin ua ong'katna man'jaengachim aro gipuangtaiangjok. Unon anga jumango Dakchakani minggipa mande saksani re'baengako nikaha.



Dakchakani ro'ongni jang'kirangko mesoka.

Dakchakani Kristianko sing'aha, "Na'a iano maiko dakenga?" Kristian aganchake inaha, "Procharok minggipa saksa mande, Re-bagnigipa Ka'onangaoni kate jokchina, angna ua apchon'gipa cholgugako mesokataha. Anga re-bamitingo ua a'miteko gipuaa." Dakchakani sing'kue inaha, "Na'a maina nijaha? Na'a a'sel gri batsote re'na man'na gita ro'ongni jang'kirang dongachim." Kristian aganchake inaha, "Anga ua apchon'gipa cholgugaona sokningna sike, skele, ua bakkandikbatgipa ramako re'esa ia a'miteko gipuaa." Unon Dakchakani aganaha, "Nang'ni jakko snilatbo." Indake Kristianni jakko rim'e, salchroe, uko a'a rakao saldoe donaha. Unon Dakchakani Kristianna agane inaha, "Namgipa aro kimkingipa ro'ongni jang'kirangko Rajani hukum gita a'miteko donaha. Mikka waon, ua a'beloni moilarangko ong'katata aro unon ro'ongni jang'kirangko nikna man'breja. Uarangko nikoba manderang miksuule ga'skete a'miteko gipua. Indiba apchon'gipa cholgugani sepangode a'a mangrakaha."

Unon anga jumango nikaha, Jola nokona sokpilahaon uni ripengrang uko grongna re'batokaha. Uni re'bapilachi gisik gnange dakaha ine mitamrang aganengachim. Mitamrang uko Kristian baksa re'angana goka ine manengaha. Gipinrang uni ka'pong ong'ana uko ka'dingsteke inaha, "Na'a songreaniko a'bachengeba, maina on'tisa neng'nikani mangmangna uko watgalna nangachim!" A'bachengode Jola, jrip jrip skotangko de'chaona mangmangba kenachim. Ua ka'dongkalbaton, ua rasong grigipa Kristianna ka'dingsteke rona a'bachengaha.

Kristian saksan sikdikdik re'angon, mande saksako a'ba gita re'baengako niksoaha. la mande, A'sakni Uiani minggipa, skia man'gipa ong'achim, aro uara Be'enna-Niani minggipa songjinmao songdongachim. la songjinma dal'gipara Kristianni nokoni chel'jachim.



Kristian A'sakni Uianiko gronka.

Kristianni janggilogipa bojani Jrimani gimin
rang'spite aro ma'amengko knae, A'sakni Uiani
uko singe inaha. "Angni ka'sara mande, indita

jringgipa bojako janggilo boe batchinasa re'engade?" Kristian :--"Oe, anga neng'bebeenga. Angni bojana bate jringgipako ripegipa donggenma ine anga kenchaka, Aro na'ade angko batchina re'enga ine sing'a ! Anga ua apchon'gipa cholgugaona re'enga. Ua cholgugao mande saksadonga ine agana. Anga maikai ua bojaoni jokani cholko angna agan'gen."

A'sakni Uiani! :-- "Nang'o jik aro dedrang gnangma'?"



A'sakni Uianini ku'pattiarang.

Kristian :- “Oe, ango gngang, indiba ia bojani sinjetani gimin a’sel skango gita, anga uamang baksa rorime kusi ong’aniko skang gita man’jaha. Angni ine aganna gita ango pilakba dongja gitan ong’pilaia. A’sakni Uiani :- “Anga nang’na namgipa ku’pattianiko on’gen. Na’a uko knana sikama ?” Kristian :- “Namgipa ku’pattiarangko anga jechakrongja.

A’sakni Uiani :- “Indide ua bojako badita ta’rake galatna man’a, inditan nang’na nambata. Uko dakkujana kingking na’a mamung tom’tomako aro Isolni pattiarango kusi ong’na man’jawa.”

Kristian :- “Uni giminan anga uko galna am’enga. Indiba anga an’tangan uko dakna amja. Angni songo donggiparangba uko galna dakchakna amja. Iani giminsa anga ia gita uko galna re’baenga.”

A’sakni Uiani :- “Ia gita re’bae bojako galna man’gen ine nang’na sawa aganatachim ?” Kristian :- “Procharok minggipa saksa mande.” A’sakni Uiani; - “Pooh, ua nang’na namjabee ku’pattiaha. A’gilsako indakgipa kenbegnigipa dongja. Na’a angni kattarangko bebe ra’janaba gngang, indiba ja’mano na’a nikgen. Na’a da’on duk chakbeaha. gandingrang Ka’donga Grini A’beloni a’mittek nangtiptipe moila ong’ahaoba na’a ua apsan ramakon re’engpiti.

Anga mang'na bribata Angko Knatimbo. Ramao na'a neng-kugen, saknaa, okkria, sin'a, tonual, matburungrang, andala aro Siako re'gronggen ; maina na'a agittal mandeni aganako knachake an'tangko ken'gniona galaha !”



Kristian ropako man'na g'itik daka.

A'sakni Uiani :- “la jringipa bojako na'a maikai man'chengachim ? Kristian :- “la angnijako donggipa Ki'tapko poraie.”

A'sakni Uiani :- "Angaba indaken chanchi-
enga. Nang'gita bilgrigipa manderangoni bang'an
agre neng'nikanirangko jakdangdike unon bildik
bildak ong'ata. Uamangni uigija agre kenanio
uamang indake dakronggijarangko maiao bon-
chotegen, ukoba uigija bingbang daka."

Kristian :- "Indiba angni nangako anga
uia. Anga ia bojako galna am'enga."

A'sakni Uiani:-"Indiba nang'ni basegipa ramara
kenbegni ong'skara. Na'a dongtoe janggi tangna
sikode, ianona na'a maina re'bara? Na'a angko
name knatimode, nang'ni am'ako kenanirangko
gele na'a man'gensan ang'jawa, indiba ua bojako
galani cholkoba man'jolgen. Angko knatimbo,
unon na'a kusi ong'ani aro dongtoanikoba man-
gen aro pilak neng'nikarangoni jakgitel ong'gen."

Kristian :- "Skigipa, ua donnuaniko angnaba
aganpabo." A'sakni Uiani :- "Atcha, anga agan-
gen. Hiwa, Gisik-Namani minggipa songo mande
saksa gngang. Uko Niam gita Re'ani minga. Ua

gisik seng'a. Ua manderangni namnikako man-gipaba ong'a. Ua nang'o donggipa boja gita dakgiparangko galna dakchaknaba man'a. Indake ua bang'en namgniranko dakaha. Ua noko dongjaode, na'a uni depante Krae-Dakani minggipako grongegen. Uaba pagipa gitan gisik seng'a. Uno na'a kusi ong'aniko aro ua bojaoni jokanikoba man'gen. Na'a songtangona re'bapilna sikjahaode, nang'ko re'bapilna anga ku'pattija. Na'a nang'ni dedrangko rimechina watatari ua Gisik-Namani songon songdongaibo. Uano mande dongkugijagipa nokrangba bang'a aro bharaba komia, cha'ani ringanirangni damrangba nom'a. Noksul namgiparang, kakket dakgiparang aro pangchakna man'giparang ong'toka. Uano na'a kusi ong'e, kenani gri janggi tangna man'gen.



Kristian ramaoni re'ekanga.

Kristian, ia rinokgipa kattarang bebe ong'ode A'sakni Uianini ku'pattianirangko knachakna gisik gngani ong'gen ine chanchiaha Indaken ua sing'aha, "Ua mandeni nokonara badia gita rama daka ?" A'sakni Uiani nikwatenggipa a'briko mesokate aganaha, "Ua chugipa a'briko na'a

nikatama ?” Kristian :-“ Oe, namen nikatenga.”
A'sakni Uiani :- “Ua abriona rama tongtong re-
angbo. Nok nikechengegipan uni nokan ong'a.”
Indake Kristian uni re'baenggipa ramako gale
Niam-gita-Re'ani nokona, dakchakaniko man'na
re'ekangaha.

Ua a'briona sokeon, ua ga'akdapna gitik
gitik dake ramao wingwange dongenggipa
rong'brakko nikeaha. Unon ua rong'brakna
ga'akdapna kene re'angkuna pa'ajok. Maiko
dakgen uijae ua uanon chadengjil'bake
dongchaaha. Uni janggilo dongenggipa bojaba
jimbata gita ong'engachim. A'brioni ripraparang-
ba tang'baengachim. Kristian an'tangko kamret-
retsrangginok ine chanchiengachim. Ua ding'ol
ong'kate aro be'en mopile kenna a'bachengaha.

Kristian, A'sakni Uiani kattarangko bebe
ra'ahani gimin gisik pil'na a'bachengon, Procha-
rokni an'tangchina re'baengako niksoaha. Unon
ua kratcha'e mikkang gitichakna a'bachengaha.
Procharok sepangona sokon uko mikchikkime
nitata inaha, “lano na'a maiko dakenga, Kristian?”
Kristian aganchakna changgija jrip jrip chadenge
dongaha.



Kristian Procharokni re'baako nike kratcha'a.

Procharok una agane inaha, "Gimagni Songjnmani pakmani a'palo grape dongako angni nikgipa mandeara na'anchimma?" Kristian :- "Oe skigipa, ua nang'ni nikagipa mandea angan-

chím.” Procharok :- “Ua apchongipa cholguga gita re'angchina anga nang'ko aganjachimma?”

Kristian :- “Oe aganahachim skigipa!” Procharok :- “Indide maikaisa da'oa ua ramaoni bakan ia ramaona na'a re'ekbaskaaha?”

Ka'donga-Grini A'beloni ong'katani bakan angko saksa mande gronge, ua angko ua songsulo donggipa mandeona re'ange ua mandeni, ia angni janggilogipa bojako angoniko galatna dakchakaniko ra'echina ku'pattiani gimin anga re'baaha.”

Procharok :- “Uara maironggipa mandechim?”

Kristian :- “Uko mande seng'gipa gita nika aro anga uni kattarangko ra'chakkujana kingking ua bang'en aganaha. Indake anga ianona re'baani ong'aha. Indiba anga ia a'briona sokeon, ua rong'brak angni skoo ga'akdapnasia gita nika anga kena ong'kataha. Indake anga bnekatako man'e sina kene re'badeangjaha!” Procharok :- “Ua mandea maini gimin nang baksa agangrikachim?”

Kristian :- “Ua angko bachi re'a ine sing'on, anga una aganaha.” Procharok :- “Na'a una maiko aganachim?”



Procharok Kristianko sing'kua.

Kristian :- “Ango jik aro dedrangba dong-ama ine sing'aha. Unon ango gnanng ine aganaha aro ia angni janggilogipa bojani sinjetako man'e, jik dedrang baksa, skango gita, kusi ongrimna man'ja ine anga aganaha.” Procharok :- “Unon ua maiko agankuaha?” Kristian :- “Ua angko bak-bakan bojako galchina ku'pattiaha. Anga uanoni jokataniko man'na apchangket cholgugaona

re'enga ine aganon, ua angna nambata aro seng'sotbata cholko mesokgen ine aganaha. Uni agana gita ia rama, nang'ni mesokatgipa ramanade seng'sotkala aro neng'nikanirangba komibatkala ine ua angna aganaha. Indake anga uni aganako bebe ra'e, chong'motgipa ramako galbae, bakbak-kale ia bojako galningna sike, ua ramako re'bas-kaaha. Indiba anga ianona sokarion aro iano obstako nikarion, ken'gnirangni gimin anga dongdikaha. Da'o maikon dakgen anga uijaha." Procharok :-"Tom'tom chadenge angko knatimbo. Anga nang'na Isolni Kattako mesokgen." Procharok kattarangko poraie on'mitingo Kristian be'en moe chadenge dongengachim. "Nibo, agangipako na'a jechaknabe ; maina Salgioni agangipaoni an'chingde joke katjawa. (Ibri 12 : 25.) Ua poraiaha. "Maikai kakketgipa bebeo tanggen, indiba saoba tang'pilode anga uni janggio kusi ong'ja." (Ibri 10 : 38.) Procharok unon Kristianna agane inaha, "Na'a tom'tomani ramaoni an'pilaha aro ua ken'gnigipa biapona re'bae da'o nang'ni janggina kenchakani gngang."



Kristian duk ong'bee gisik pil'a.

larangko Kristian knaon uni ja'ao ga'ake
aganaha, "Gose, agangiminjok!" Procharok uko
jako rim'e saldoe aganaha,

"Manderangni je pap aro kal'stapani-

rangkoba kema ka'gen, ka'donga gri ong'nabe, indiba ka'dongaibo." (Mat. 12 : 13 aro John 20 : 27.) Iako knaon Kristian namkalpile, indiba be'en mokue Procharokni mikkango chadengaha. Procharok indake aganangkuaha, "Nang'na aganasigiparangko gisik nange knatimbo. Nangko. sawa indake maniataha aro ua saona nang'ko watatachim, uko nang'na agangen. Nang'ni gronggipa mandeko A'sakna Uiani ine minga. Una krara bimungkon on'aha, maina ua a'gilsak gita gisikko namataniko namnika. Chisol aro Jokatanirangko skianiko knachakjawachim. Ia A'sakni Uianini ku'pattiao minggittam gualbeani gngang. Ua nang'ko dilsretaha aro nang'ko chisolko namnikatgipa dakate signiona watatskaaha." Kristian unon uni siani somoi sokaha ine chanchie chanchiman'pile indake ma'ame aganengachim, "A'sakni Uianini kattarangko ra'na aro kakket ramako gelna gita anga indltan goka changaha."

Procharok da'o una ua apchon'gipa ramako mesokattaiaha, aro goka daktaijachina mikrakataha. Kristian re'piltaina tik ka'manon Procharok ka'dingsmitaha aro Isolni re'dilanioniona uko pakwatataha. Kristian re'chakataion gipingrang baksa agangrikaniko gelaha, maina ua rama chong'motona sokpilitaikuja kingking kenkuaiengachim.



Gisik pil'taie Kristian re'pilna tik ka'a.

Kristian re'ange ua apchon'gipa cholguga-
ona sokon kosako indake seako nikaha, "Dok-
tikbo, unon nang'na do'gako osogen." (Mat.
7 :7.) Indake ua re'ange doktikaha. Bon'chotao
saksa namgipa mande Ripeng minggipa do'gako
oe sing'aha, "Na'ara sawa baoni re'bara aro
maiko nanga?" Kristian aganchake inaha, "Anga
saksa kangal, ba jime ripegipa papi, Gimagni
songjinmaoni re'bara aro Zion A'brichi re'enga,
jedakode Re'bagnigipa Ka'onangaoni jokpana
man'gen."



Ripeng Kristianko salnape kata.

Ripeng Kristianko bakan salnape kataha.

Unon Kristian unì indake dakani miksongako

sing'e inaha, "Na'a angko maina skele salnape katachim?" Ripeng una agane inaha, "Ianoni chel'gijaon Satanni nok donga. Ua ianona re bagiparangko ua nokoni niwate dongronga aro brarangko goatronga. Mitam rasong grigiparangko brarang nange sironga aro nokningchi napna man'rongja."

Kristian :-"Anga so'otako man'jahani gimin kusi ong'a, indiba anga be'en moe kenaha." Ripeng :-"Sawa nang'ko ianona re'bana aganatachim?" Unon Kristian una ramao ong'a pilakkon agane on'tokaha. Ripeng uni aganako gisik nange knatime indake aganaha, "Ang baksa napbabo. Anga ramao ong'gnigiparangko, nang'na mesokgen. Nang'ni mikkangchiko nibo—na'a hiwa sronggipa ramako nikatama? Urangko giticham Katchinikgiparang, Kristo aro uni sninggiparang dakangaha. Ua ramani samtangtangchiba ramarang gnang. Uaranga apala aro gonggea. Indiba jakrachigipa ramasa apchona aro sronga. Na'a ua rama gita tongtong re'angbo, unon na'a Pe'skagipani nokona sokegen. Na'a uko doktikon ua nang'na aiao inmananirangko mesokgen."



Kristian sronggipa ramako Pe'skagipani nokona re'anga.

Kristian Pe'skagipani nokona sronggipa ramako re'angachim. Ua Pe'skagipani nokona sokeon do'gako doktiktaitaiaha aro bon'chotao

mande saksá re'bae sing'aha, "Na'ara sawa?" Kristian una aganchake inaha, "Anga nokni nok-gipako nangachim." Unon Pe'skagipa uko okame inaha, "Napbabo aro anga nang'na namgnirangko mesokgen." Indake Pe'skagipa chakkol saksako okamate mombati gesako ra'bachina aganataha aro uko turam, kuturisaona rimnapaha.

Uano ua mikkim gngangbegipa mandeni noksako nikaha. Ua mandea manderangko mol'molenga gita niengachim. Uni mikronrang Salgichiko nigitoachim aro uni jako nambatgipa ki-taprang gngangchim. Ua sonani mukutko skoo stikachim aro a'gilsak uni ja'mano re'achim. Pe'skagipa indake aganaha, "Ia mande manderangko atchi-attaie dingtangatna man'a. A'gilsakko uni ja'mano re'engako mesokara aro uni skoo muktara, a'gilsaknirangko mitchigiparang Salgini pattianiko man'rikskagen ine mesokani ong'a." Unon Pe'skagipa uko a'dumuan gapgipa dal'gipa kuturi ge'saona rimangaha. Ua kuturiko mamung saloba itokjachim. Pe'skagipa on'tisa niwilwale

ua mande saksako nike ua kuturiko introkchina ge'etaha. Uko sel'achi itrokon a'dumurang inditan guuri gita tang'doaha; maikai Kristian rang'sitnan man'japila gita ong'aha. Unon Peskagipa uano chadenge dongenggipa me'trako kuturiko chichi satkikichina ge'etaha, "Kuturiko chichi satkiki-bo." Indake kuturik rongtale itrokna man'aha. Kristian unon sing'e inaha, "lara maiko mik-songa?" Peskagipa agane inaha, "la kuturiara mandeni ka'tong aro a'dumuara pap ong'a, jean ka'tongko ong'siata."



Kristian kuturiko itrokani chol minggniko
skie ra'a.

“Ua skang itrokipara Niam ; aro ua
me'chik bi'sa chichi satkikigipara Nama Katta

ong'a. Niamara ka'tongoniko papko ronglatatani
pal janggio papko tangatpila, indiba Chi'gipa
aro Bilakgipa Nama Kattani bilara papko ama
aro unosan janggi rongtalaia. Unosa rasongni
Rajani dongram ong'na kragipa ong'a.



Sengnagija aro Sontol.

Anga jumango nikaha, Pe'skagipa Kristianko jako rim'e chon'gipa kuturi ge'saona rimangtaiaha. Uano sakgni bi'sarang gngangchim. Saksako Sengnapgija aro sakgipinko Sontol mingachim. Sengnapgijako jajrenga gita nika aro Sontolkoa tom'tombea gita nika.


Kristian Pe'skagipao sing'e inaha, "Nambat-gipa bosturangna uamang sakgnikon ma'a paa aganani gimin indake ong'enga." Unon anga saksani Sengnapgijani ja'ao jebongsa tangkako pakrurue doneako nikaha. Sengnapgija ka'dinge, Sontolko amahani gimin kusi ong'e ua tangkarangko koldoaha. Indiba ua uarangko bang'gija salrangni gisepon koros ka'e gimaataha aro ba'ra surina agre uo mamungba dongjajok. Pe'skagipa agane inaha, Sengnapgijara agilsakni manderangko mesoka. Jedake Sengnapgija jedake pilak sukrangko man'na sika, indake a'gilsakni manderangba da'on namarangko man'na sika. Uamang siani ja'mano janggiona, jedake Sengnapgija tangkarangko didiksaon koros ka'e galtoka gita a'gilsakni sukrangko am'giparang ong'aigen."



Kristian kimitna man'gijagipa wa'alko nika.

Unon Pe'skagipa Kristianko pakma sambao
wa'al kamenggipa kuturiona rimangaha. Uano
mande saksa sambao chadenge dontonggija chiko

rudapengachim, indiba wa'al jelbatroroesa kamskaengachim. Kristian uni ortoko sing'e inaha, "lara maiko miksonga?", Pe'skagipa agane inaha, "la wa'alara mandeni ka'tongo Isolni ka'sachake indin on'ani ong'a. Wa'alo chiko rudapenggipa mandeara Satan ang'a. Ua wa'alko kimitna man'jaenga aro wa'al batesa kambatenga. Iani a'selko anga nang'na mesokgen." Unon Pe'skagipa uko pakma samsachi Kristianko rimangaha. Uano ua mande saksani toko wa'alo dontonggija rudupskaengako nikon Kristian uko sing'e inaha, "lara maiko miksonga?" Pe'skagipa agane inaha, "lan Kristo, manderangni ka'tongo ia Isolni indin Ka'sachakaniko on'ani jensalo a'bachengaha unon ua Ka'sachakaniko rakkina dakani kam ong'a. Satanni bil jegitaba dongbo, manderangni ka'tongo Ka'sachakaniko a'bachengatahani gimin uko gimaatna man'ja. Nang'ni nika gita, ua pakmani mitino chadenge dongenga. Je manderangan uko nina sika, uamang maikai ka'sachakaniko tange rakkienga uko nikna man'a.



Sakbri manderangni silchidareko ra'e nitim-
engako nika.

Unon Pe'skagipa Kristianko nitogipa aro
mikkim gngangipa do'gacholona rimbaaha. Uano

Sakbri bilakgiparang silchidarerangko ra'bite cholgugani mikkango dongengachim. Do'gacholni ketchichi saksa, sechakramo, ki'tap kingsako ra'bite napbagiparangni bimungranko serikna sengengachim. Bang'a manderangan napna ua do'gachol mikkango senge chadenge dongtokengachim, indiba uamang silchidarerangko ra'bite dongenggiparangna kenani gimin napbana pa'jaengachim. Ua nok dal'gipani pakmani kosako bang'bea ba'ra gipokko gangiparang chadenge, senge dongtokengachim. Indiba saksaba ua silchidarerangko ra'e dongenggiparang baksa ka'donggipa dongjajok. Unon Kaistian saksa ka'donggipa mandeni serikgipaona re'ange indake sing'eako nikaha, "Angni bimungko sebo, Skigipa." Serikgipa bimungko serikman'on ua silni tupiko stike aro tonualko saloke, ua silchidarerangko ra'e chadenge dongenggiparangchi chasinapange bilongbee dakrikaha. Indake dakon ua an'tangba aro uamangba bang'en mata bu'ako man'e ua bon'kamao rajani nokona napangaha. Unon nokningchini knatobegipa

gitrangni ku'rangrangni gam'baako knasoaha.
Kattarang indake ong'achim :—

“Napbabo, napbabo,
Cham'gija rasongko na'a amgen.”

Indake ua napangon dongsogiparang gitan ua chola gipokko ganaha. Kristian aganaha, “lani ortoko anga uia ine chanchia.” aro ka'dingsmite ua an'tangko re'angna watchina bi'aha. Pe'skagipa agane inaha, “Dikdiksa sengkubo, anga nang'na mesokdapkuani gnangpiti ; uni ja'mano na'a re'angna man'ginok.” Indake ua uko andalgipa kuturiona dilangaha. Uano mande saksa silgrakni kachani ning'o asonge dongengachim. Ua mandeko duk ong'bea gita nikachim. Ua a'achiko nione, jaksamgniko chopjole, asonge dongengachim, aro ka'tong bretpilnasia gita ong'pile rang'sitdatdatengachim.



Kacha ning'o mande asongé dongenga.

Kristian sing'aha, "lara maiko miksonga?"
Pe'skagipa agane inaha, "Na'an uko sing'e nibo."
Kristian iako knaon kachani sepangona re'ange

sing'e inaha, "Na'ara sawa?" Ua mande aganchake inaha, "Angaba changsao saksa nambegipa kristian ong'pa'achim aro Salgichi re'na kadongbe-achim aro uano dongpana kusi ong'beachim." Kristian sing'kue inaha, "Indiba da'o na'a maikai chanchia?" Ua aganchakaha, "Da'o anga kenbee jajrengenga; maina anga an'tangko mikrake nitimjaenga. Anga namgipa ong'gija angni namgija be'enni sikarangko lagam patjaha. Indake anga Kattani teng'suana aro Isolni Namana papko dakaha. Anga Satanko ruraaha aro ua angona re'baaha. Anga Gisik Rongtalgipako duk on'aha aro ua angoni re'angaha. Anga da'o ka'tongko inditan rakataha; maikai da'o anga gisik pil'na man'ja." Kristian sing'aha, "Na'a gisik pil'e re'bapilna man'jahama!" Ua aganchakaha, "Isol angoniko gisik pil'aniko ra'galsrangaha. Ua angko ia kachao chipchange donaha. Oh Jringjrot! anga maikai ia jringjrotni sastiko chakginok!" Unon Pe'skagipa Kristianko agane inaha, "Ka'sapae na'a ia mandeni dukko gisik ra'e an'tangna simsakbo."



Pe'skagipa Kristianko mikrakata.

"lan kenbegni ong'a," ine Kristian aganaha. "Isol angko namgipa ong'na dakchakchong, Skigipa. Da'o angko re'angna on'pabo." Pe'skagipa agane inaha, "Anga bang'batako nang'na agankuna gita sengkubo." Indake ua uko turam kuturisaona rimangon, mande saksa tusiaoni chakate palango asongengako nikaha. Ua uni ba'rarangko ganmitingo, ua be'en moengachim. Unon Kristian uo sing'aha, "la mandea maina be'en moenga?" Pe'skagipa ua mandekon aganchina ge'etaha. Indake ua mande agane inaha, "Da'siwalo anga jumang mingsako nikaha. Salgio kenbegni ong'pile andalaha. Unon nigitoe nion, saksa mandeni aramo asongengako nikaha. Uko hajalni hajal sa'grerang dongduulengachim. Unon anga ku'rang ge'sako knaaha, "Na'simang sigiminrang chakatbo aro bichalona re'babo." lako knaarion, bang'a manderangni goprangoni chakatako nikaha. Uamangoni bang'an kusi ong'begiparangchim, indiba mitamranga kengokenggiparangchim. Unon anga indine gam'bee ku'rangko knaaha, "Maranko aro megapko wa'alni warichi galatbo." (Mat. 3 : 12, 13 : 40, Para 20 : 12).



Tu'begipa A'kol.

Unon tu'begipa a'kol angni chadengenggipa biapo tiktak oprakako man'aha aro uanoni wal'ku aro wal'rang tang'potpotbaengachim. Bichal salde sokchongmotaha, indiba angade tarikujaenga ine anga kenbeahachim."

la gisikni skianirangko Kristian nikmano mikkangchi re'taina salam ka'aha. Pe'skagipa uko isolan dilangchina pattiataha aro indake aganaha, "Ka'sara Kristian, Ka'dimeatgipa nang baksa pangnan dongchong aro nang'ni ramao dilangchina." Kristian da'o git ring'e re'chakatangaha.

Anga jumango nikaha je, Kristianni re'ang-enggipa ramani samtangtangchi pakmarang dongachim aro uko Jokatani ine mingachim. Kristian ua gitan katangaha., indiba janggilo boja donggipani jrimani gimin bang'en neng'nikaniko man'achim.



Kristian chisolona re'baa aro boja uni janggiloni
ga'akona.

Kristian chugipa biapona sokkujana kingking
re'anguaha. Ua a'kimbrio bolni chisol gnan-

chim aro gopramba ka'mao g'ngangchim. Kristian chisolona re'bahaon uni boja a'aona ga'akonaha aro goprmona kingking romromonangaha. Goprarni ku'mangona sokon anga uko niktaijajok. Namen ritchengatako man'e Kristian ka'tong ritchengatako man'e aganaha, "Uni duk chakachi anga neng'takako man'a aro uni siachi anga janggi-ko man'a." Kristian ua chisolko, jekon niachim an'tangni bojako ritchengataha, ukon name nitatkuengachim aro uni mikronrangoni mikchirang joksolsolbaengachim. Ua chadenge grapengmitingo, sakgittam ching'giparang re'bae, uko chaksoe indake aganaha, "Nang'na tom'tom ong'china !" Skanggipa aganaha, "Nang'ni paprangko wataha." Gnigipa, uni ba'ra surirangko ra'gale, gital ba'ra gipokko una ganataha. Gitamgipa, uni mikkingo chinko dakate, una kingsa lekha dol'ako, mohor su'ako una on'aha aro uko ramadilo poraie, Salgini do'gacholona sokangon uko on'echina aganataha.



Kristian ramatanko kusi ong'e, bilchroke re'anga.

Anga jumango nikaha, ua a'briko ong'on-angengachim. A'brini ja'pao, silang sambao, sakgittam manderang, uamangni ja'arango sildengchi kaa gnan, namen tusingachim. Saksani bimungko Nangrachok, sakgipinko Aratsoso aro gittamgipako Gangbo mingachim. Uamangni tusiako nike Kristian de'mesana jotton ka'aha. Ua kenbegnirangko uamangna mesoke uamangko de'mesae aganaha, "Kenbo, uano tu'begipa a'kol na'simangni ning'aon donga. Re'babo, anga na'simangni ja'ao kagipa sildengrangko enge watgen." "Chinga mamung kengniko nikja." ine aganari uamang tusingpilaiaha. Indake Kristian uamangko wate re'angna nangaiaha. Indiba uamangni kengniko nikjaengani gimin Kristian uamangna duk ong'chakengachim.

Uamangni gimin chanchie re'angmitingo, sakgni manderang, chong'motan, Niamko—Ja'rikani aro Cha'chipilani minggipa, apchon'gipa cholgugani jakasichipakchini bilone re'baengachim. Uamang Kristianni sambaona sokon, Kristian

uamangna agane inaha; "Dal'gipa manderang,
na'simang baoni re'bara aro bachina re'enga ?"
Uamang aganchake inaha, "Chinga Ong'gramaiani
asongo atchigiparang ong'a aro chinga rasong aro
mingsinganiko am'na Salgiona re'enga ?" Kristian
sing'e inaha, "Nasimang Salgiona re'enga ine
agana, indide apchangket cholguga gita re'bagija
maikai pakmako gadoesa re'baskaaha ? Iani
ortode, na'simang a'songni niamko manijaha.
Salgini Gitel na'simangko napna on'jawa." Sakgnian
aganchake inaha, "Chingni ramaan seng'sotbata,
aroba chingni a'songode indaken dakbewalba
ong'ia. Na'a apchongipa cholguga gita napbaaha
aro chingara pakmako gadoe napbaaha. Indiba
an'chinga apsan ramakon re'engake."



Uamang maina pakmako maldoe re'bara ine sing'a.

Indiba Kristian aganchake inaha, "Re'mit-ingo anga Gitelni Niamrangko mania, ramani Gitel da'on na'simangko chaugiparang ine chanaha." Uni kattarangna uamang mamungkoba aganchak-gija indakesa aganchakaiaha, "Chinga chingni sika gita re'gen, na'a nang'ni sika gita re'aibo."

Dikdiksani ja'mano Niamko-ja-rikani aro
Cha'chipilani Kristian baksa jegrikna miksonge
inaha, "Chingaba nang'gitan niamko mania.
Nang'ni aro chingni gisepo dingtangrikania
gandingosan ong'aia, haida na'a uko nagandeako
pindapnasan ganaia." Kristian aganchake inaha,
"Gitel angna ia ganding chindingko on'aha. Anga
Salgini cholgugaona sokeon, Gitel angko ia uni
on'gimin gananion uisogen. Angni mikkingoba
chin gnanng aro mohor su'gimin lekka dol'aba
angni jako gnanng, Jekon anga Salgini cholgugao
on'ena nanga. Anga kenchaka, na'simang ua
apchangket cholguga gita re'bajahani gimin uarang
n'simango dongjahakon."




Kristian Niamko-Ja'rikaní aro Cha'chipilanina
aganchaka.

larangna uamang aganchakjaha, batesa
uamang sakgara sakgipinchiko nitatgrikesa ka-
dingaiaha.

Sakgittaman damsan re'angkue uamang Neng'ani A'briona sokeaha. Ua a'brini ja'pao chimik damsang'chim aro ianon ramaba dilgni g'ng'chim. Dilsara jakrachi aro dilgipinara jakasichina dakang'chim. Ia dilginini gisepo apchon'gipa rama dilsa g'ng'chim aro uara tongtong a'briko dakdoang'chim.

Kristian chimikona re'ange chiko ringaha. Indake ua neng'ako namate apchong'gipa ramako doangaha.

Niamko—Ja'rikani aro Cha'chipilani a'brini ja'paona sokeon a'bri ku'chotko chuprete nikatachim. Indake uamang a'bri ja'pa joljol dakgipa ramarangko re'angskaaha. Saksa kengni ramako re'ange bolgrim a'bimanduo gimaaha. Sakgipin gimaani ramako re'ange silang chubeaoni ga'sol-tape ga'akone siaha.



Kristian a'briko maldoanga.

Unon anga Kristianni a'brini ramako maldoangako nikaha. A'bachengao anga nikaha, ua katdoe re'angengachim, indiba uni ja'manoa ka'sinbate re'angaha. A'briara inditan chutinga; maikai ua jak ja'arangchi rim'e maldonasa nangpilachim.

A'brini jatchio noksa an'senbegipa bandasalko rike dona gngang. Uko A'brini Gitel, neng'bee songregiparang neng'takchina rike donachim. Kristian uni salakimona re'bae asonge neng'takaha. Ua lekka dol'ako ka'baktangoniko ra'ongkate uko poraina a'bachengaha. Indiba neng'beahani gimin ua bakan tusinge tusimepek-srangaha aro lekka dol'ako jakoniko jakwate asongramni ning'chi tang'angaha. Uni indake tusimitingo mande saksa re'bae uko de'mesae inaha, "Chibrimrangona re'angbo, oh na'a aratgipa, aro uarangni kamrangko chanchie gisik gnganggipa ong'bo." (Toe. 6 : 6)

Kristian rang'san chakataha aro a'bri kimbriona sokkujana kingking ta'rake katdoangaha.

Unon sakgni manderang bichi paknan katbaengako
niksoe aiao inmanengachim. Saksako Ka'pong aro
sakgipinkoa Kenchakani ine mingachim. Kristian
uamangko indake sing'soaha, "Dal'gipa manderang,
mai a'sel ong'a? Na'simangde rama ong'gijakosa
re'enga.



Ka'pong aro Kenchakani re'bara.

Uamang aganchake inaha, "Chinga singho
manggniko nikbaaha. Chinga badita re'anga

inditasa kenanirangko nikbatroroa. Uni gimín chingade katpilenjok." Kristian aganaha, "Na-simangko kenata! Da'o anga badia nambata? A'songtangona re'pilanma, uanode anga sichongmotgen. Re'mikkangkuode kenanio siani, indiba ramani bon'ao jringjrotni janggi dongani gimín anga mikkangchin re'angkugen.'

Ka'pong aro Kenchakani a'briko katonangaha. Kristian re'mikkangangka. Ua re'angmitingo ka'dimeataniko man'na lekka dol'ako poraina gisik ra'aha. Ua ka'bakoniko rim'ame nioa ua gimaaha ine nikaha. Bandasalo tusimitingo uko uanon ga'akatbaaha ine gisik ra'kujana kingking aiao inmanpile jajrengbeeangachim. Ua ja'sku dipane lsolni kemako bi'aha aro ua lekkako am'na re'pilangaha.



Kristian ta' rake lekka dol'ako am'anga.

Ua lekka dol'ako am'angendon duk ong'e
aro rang'spite graprroe re'angengachim. "Gitel

songregiparangna uko rikahachim. Maikai indakgipa neng'ani biapo tusinara anga pap ka'aha!" ine Kristian aganengachim.

Ua bandasalona sokon bilsa asonge graptai-aha. Indiba ua duk ong'bee niwilwalon, lekka dol'ako asongramni kokkimaog ga'ake dongengako nikataha. Ua namen kusi ong'bee uko kolamdoe ka'bako chipe dontaiaha. Ua lekka dol'ara Salgiona re'ani passport ongachim aro jringjrotni janggina ka'dongatani ong'achim.

Kristian da'o bangki a'bri re'na nangku-gipako ta'raken doangtaiaha, indiba ua a'kimbriona sokpilon salde napangaha. Ua guale tusiahani gimin graptaiengachim, aro da'o ua Ka'pong aro Kenchakani sakgnini agangipa singhorangni gimin (jerangan uamangko kengokatachim) gisik ra'aha. Indake ua an'tangna aganengachim, "la matburungrang angko walo nikode uarang angko tong'tang tong'tang ong'atgen." Ua an'tangni gualani gimin gisik pil'engon ua nigitoe Daknanga minggipa nitogipa nokko nikataha.



Kristian singhorangko nika.


Indake anga jumango nikaha, Kristian ua
nokona waltuna ta'rake re'angengachim. Indiba

ua chel'e re'angujaon ua apchongipa ramaona sokaha aro sepangon singho mangniko cholguga samtangtangchi nikataha.

Ua an'tangna indake chanchiengachim, "Anga Ka'pong aro Kenchakaniko kengokatgipa kengniko nikaha." Indiba do'ga dongtingipa jekon Mikrakgipa mingachim, ua Kristianni katpilasiasia gita dongdikengako nikate chrike aganwatataha, "Na'a maina ka'pong ong'a? Singhorangna kennabe, uaranko kae donasa, aro nang'ni bebe ra'ako ninasa donaia. Ramani jatchi joljol re'baaibo, unon mamung saknaani dongjawa."

Kristian singhorangna kene, be'en moe re'angaha aro do'ga dongtingipani skiata gita ja'rikengachim. Singhorangni rangdingako ua knasoengachim, indiba uarang mamung dakjaha. Do'ga dongtingipaona sokeon Kristian uo sing'aha, "Anga iano waltuna man'pagenma?" Do'ga dongtingipa aganchake inaha, "Ia a'brini Gitel, songregiparang kenani gri neng'takna man'na gita

ia nokko rikaha. Indiba na'ara baoni re'baachim aro bachina re'enga?" Kristian aganchake inaha, "Gimagni songjinmaoni anga re'bara aro da'o Salgini Sonjinmaona re'enga. Anga ianon da'awalo waltuna nanga." Mikrakgipa sing'e inaha, "Ka'sapae, nang'ni bimung mai?" Kristian aganchakaha, "Skango angko Ka'sachakani-gri mingachim, indiba da'ode angko Kristian ine mingjitaha." "Na'a maikai ja'man chake re'baaha; maina sal da'o napsrangaha," ine Mikrakgipa sing'aha. Unon Kristian maikai ua bandasalo tusidapaha aro lekka dol'ako gimaate, adita re'baani ja'manosa uko gisik ra'e, re'angpile am'etaiesa re'baoa ruutdugaaha uarangko agane on'tokaha.



Mikraskgipa Kristianko “maina indita ruute
re’baa” ine sing’a.

Unon Mikrakgipa gantiko rengtengataha. Indake me'tra saksa Chanchisoka minggipa uanona re'baaha. Mikrakgipa Kristianko Chanchisokana agane on'e aganaha, "Na'a namnikode una walsa tuna on'pabo."

Chanchisokani sing'arangna, Kristian maikai uni songreaniko re'baaha aro ramao mai mairangko re'grongbaaha, uarangko agane on'tokaha. Kna-timmitingo Chanchisokani mikronrango mikchirang jokengachim aro ua aganaha, "Anga ia nokdangni manderangko nang'ko grongna okamatchenggen." Indake ua cholgugaona re'ange, Mikasal, Rongtala aro Ka'sachaka, ia sakgittamko okamaton, uamang re'bae, Kristian baksa agangrikaha aro uamang ua nokdangni dongpitigipa gipinrangkoba grongso-pachina okamataha. Uamang bamgope salam ka'e indake aganaha, "Napbabo, Oh Gitelni pattiako man'gipa!"



Mikasal, Rongtala aro Ka'sachaka Kristian
baksa agangrika.

Kristian uamang baksa re'ange, kuturi ge'sao nape, uano asongna biapko ra'aha, aro uamang una ringaniko ra'bae on'aha. Indake Mikasal, Rongtaka aro Ka'sachaka Kristian baksa meatam song'a minkujana kingking agangrike rokuaha. Uamang ia A'brini Gitelni gimin waltingaona kingking agangrike rokuachim. Unon uamang attamni bi'aniko dakmanoa, kuturi tangtangona neng'takna re'bildangtokaha. Uamang una ge'sa dal'gipa kuturi, Tom'toma minggipako una tusichina mesoke on'aha. Ua kuturini kelkiara sal nabaramchipak an'paachim. Kristian uano sal nabaona kingking tom'tome tusiaha.

Pringo uni ripengrang, ia a'brini madrangni gimin see dongimin serikanirangko nikkujana kingking ua ia biaponi re'angna nangkuja ine Kristianna aganaha. Serikanjo gita, uara Isolni Dapante, jeni a'bachengã aro chon·kamaba dongja aro ua Songnokko ame man'rikaha aro ua an'tangni kosako namgija dake agangiparangkoba kema

ka'aha. Ua pilak Katchinikgiparangni aganso-
rangkoba chusokataha ine uamang Kristianna
mesokaha.

Unikoa uamang uko silchidarerangko
donram kuturiona rimange, una rokom rokom
silchidarerangko, jekai, tonual, silni tupi, silni
chelo pa'ani, bi'ani aro jutarangko, jerangan pang-
naba cham'ijagipa ong'achim, uarangko mesokaha.
(Eph. 6 : 11-18) Una agreba giticham bosturang
jerangchi dakgrike ka'dongani kamrangko daka-
chim, uarangba uano gngangchim. Kristian ua-
rangko nikna kusi ong'beaha,



Satanni tol'napanirangko warachakna
silchidarerang.

Kristian re'angkuna miksongon, uamang uko salgipinoba dongkuchina mol'mole, indake aganaha, "Da'alo sal gnangode chinga nang'na Niwattoa-A'briko mesokugen." Kristian unon dongkuna ku'rachakaha. Pring gipino uamang uko nokking kosakona rimdoange, salgipengchi-pakko niatchina ge'etaha. Ua chel'beao, an'seng-besusu niggipa a'song, a'brirang aro bolgrimrang-chi duulgipako nikataha. "lakon Immanuelni a'king ming'a. Na'a uanona sokeon, Mes Nirik-giparang nang'na Salgini Songjinmako uanoni mesokatgen !" ine uamang Kristianna aganataha.



Kristian dakgrikani gandingko gana.

Uamang una indake aganaha, "Indiba silchi-darerangko donram kuturiona re taikubo. Ramao bobilrangni chagroparang ong'on an'tangko warakchakna gita Isolni dakgrikani ganding chindingko na'a gane re'angna man'gen."

Dakgrikani ganding chindingrangko ganmanon ua uni ripengrang baksa do:gacholona kingking re'baaha. Uamang do:gacholona sokon, songregiparangni re'pakangako nikrikpaama ine Kristian Mikragkipao sing'aha. "Oe, anga saksa Bebegipa mingipani re'angako nikrika. Ua ia a'briko da'ode ongonanga matchotginok." ine Mikragkipa una aganon, kusi ong'beako mesoke Kristian aganaha, "Anga uko uia, ua angni songjinmaon dongachim aro angnin noksul ong'achim. Anga uko srapna jotton ka'na nanga."

Kristian indake re'chakattaiaha. Chanchisoka, Mikasal, Rongtala aro Ka'sachaka re'dinatna agane, uamang ramajoljol Jokatgipani gimin kusi ong'e golpo ka'anguahaha. Uamang a'briko ong'onangmitingo Kristian agane inaha, "A'briko dona neng'bea, indiba ong'onnara kenani ong'skara." "Oe, nang'ni agane kakket ong'a. Rasong onani a'kawona ong'onna neng'bea. Uni giminan nang'na mamung a'sel ong'jana gita chinga nang'ko re'dilbaenga." ine Chanchisoka una aganchakaha.

A·brini ja·paona uamang sokeon, uni ripeng-
rang una botolsa drakka bitchini chuko on·ataha,
aroba ruti dotsa aro drakka bite chokchimsakoba
on·ate uamang uko wate re·angpilaha. Ua
uarangko mitele rachakrikaha aro indake saksan
Rasong Onani A·kawechipakna re·angaha.

Kristian ia a·kaweo rake dake nianiko man-
aha. Ua on·tisa re·angani ja·manon ua saksa
skal Appolyon minggipako niksoaha. Kristian ua
skalna kenahachim aro ua unpile katginokmaba
uanon chadenge dongnama uko chanchiengachim.
Unon ua re·mikkange ua Appolyonko mikkanggrik
grongaha.



Kristian Appolyonko ma'sia.

Ua skalara nina nidika. Be'en gimikon na'tokni sta gita dakgiparangchi pindapachim. Uni grangrang dragonni grangrang gita aro uni ja'parang mapilni gitachim. Uni singhoni ku'sik gita dakgipaoni wal'ku aro wa'alrang ong'kat-achim. Ua Gimagni songjinmani raja ong'a aro Kristianko so'otna am'aha.

Appolyon :- "Na'a angni raiotrangoni saksa ong'a. Aro angan Gimagni songjinmani isol aro raja ong'a. Na'a maina nang'ni rajani a'kingoni kat'baaha ? Na'a angna kakket ong'e dangdike on'gen ine ka'dongjaode anga nang'ko doke a'aona gitilatgen.

Kristian :- "Beben, anga nang'ni a'kingo atchiachim. Indiba nang'na dangdike on'na neng'ani ong'a. Nang'ni dormahao mande janggi tangna amja; maina "papni dormahara Sia." Anga Rajarangni Rajana kam ka'enga. Uni dormaharang, kam aro uni a'song nang'nina bate nambata."

Apollyon ia kattarangko knaon ka'onang-beaha. Ka'onangbee ua Kristianni ka'tongona

wa'alni brarangko goataha. Indiba danilchi
an'tangko champengaha. Unon bakan ua gisikni
tonualko saloke Appolyonko chagropaha.



Apollyon ka'onanga.

Uamang sakgni sal belasana kingking dak-
grikoba amgriksjaengachim. Kristianni skoo aro
ja'arangko matgipa parirangoni an'chirang bilongen
jokengachim. Bon'chotao ua Appolyonko wara-
chakna amjajok aro tonualko uni jakoniko
jakwataha.

Indiba Appolyon uko so'otnasimitingo,
Kristian malambrake, tonualko kolamtaie inwate
inaha, "Angni kosako kusi ong'nabe, Oh angni
bobil! Anga gitiloba anga chakatpiltaigen."
(Micah 7 : 8) la kattarangko chrike ua Appolyonko
an'tangni tonualchi Appolyon tang'pilna gita uko
sina gita bilongbee su'protataha. Ong'ja, ia
pilakon, chingna Ka'sagipani bilchi bang'bate
ama." (Rom. 8 : 37) Kristian indake chrike
su'protaiaha.

Appolyon amako man'e grangtangko badale,
bile katangaha. Kristian uko niktaijajok. Mat-
samgnigipa tonualchi Appolyonko amon Kristian
ka'dingsmite, Salgichiko nigitoe aganaha, "Singhoni
ku'sikoniko aro Appolyonni jakoniko angko
jokatgipako mitela."




Kristian mitelpilaniko on'a.

Unon boljanggini bijakrangko ra'bagipa jak
uona re'baaha. Uarangko Kristian ra'chaksoe
uni skoo aro ja'arango mata parirango dondapaton,
parirang rang'sanan nampilaha. Una on'atgipa

Rutirang aro drakka bitchirangko cha'e aro ringe mangrakpilon, on'tisa neng'takkue ua ramako re'angtaiaha. Ua aganaha, Haida, gipin bobilrang dongsotainaba g'ngang." Indiba ua Appolyonko Rasong Onani a'kaweo grongtaijajok.

Unon anga jumango nikaha, ua Siani.Jagring-ni-A'kaweko rama dakangachim. Ua ramani jakasichi tu'begipa chikare aro jakrachi a'mitekarigipa chibol g'ngangchim. Ua samsachini tu'begipa chikareko gelna dakon samgipin a'mitekarigipa chibolo ga'akskana daka'achim. A'kaweni bijatchio Norokni wa'al aro wal'kurang tang'potpotba-engachim. aro misilbegipa kenbegni skalrangni ku'rangrangba gam'baengachim. Kristian uarangko knasoengachim.



Gital silchidare—Bi'ani.

Iano Kristian, uni tonualko chukopo chip-
pile, done, uni gital silchidare—Bi'ani minggipako

bikotskaaha. Ua indake bi'na a'bachengaha. "O Gitel, anga nang'ko mol'mola, angni janggiko jokatbo." (Eph. 6 : 18.) Indiba niggijagipa skalrang sepangbatroroe re'baenga gita ua uiso-achim. Uamang uni kosakona re'baon, ua indake chrikaha, "Anga Isolni bilo re'ruragen." Unon uarang an'pile sepangona re'bataijajok.

Pring ong'on ua nipilate mai rokom kengni-rangko ua walo re'baaha uko nikaha. Ua rongtale ua tu'begipa chikareko samsachi aro chibolko sangipinchi nikataha aro apchonbegipa rama jatchio dongachim. Chel'ao ua dragonrangko aro skalrangkoba nikatachim, indiba uarang salni somoio sepangona re'bana pa'jaha.

Kristian, ua a'kaweni a'timbo dakgipa biapona jeonin pilakchikon nikwatachim, ua biapona sokeaha. Bebegipa uni mikkango re'angenga ine nikate, ua aganwatataha, "Dikdiksa sengkakubo." Bebegipa aganchake inaha, "Anga sengsona man'ja ; maina an'china jakbikpilsdagipa angko ja'rikenga." Kristian iako knana duk ong'jaha. Ua ta'rake Bebegipako srapekujana kingking katangaha. Indiba ja'kurangna simsakjae ua ja'gitote gitilaha.



Bebegipa Kristlanko dakchaka.

Bebegipa uni gitilako nikon ua uona rikange uko salchroe chakatataha. Indake uamang ka'sa-grikbee, uamangni ramao aro songreao mai mairang ong'baaha, uarangko agangrike re'ang-engachim. Kristian :- "Angni ja'mano badita ruute na'a ua Gimagni songjinmao dongrikkuachim?" bebegipa :- "Anga bang'a salrang uano dongkuna man'jaha. Anga nang baksan re'bana chanchiachim, indiba na'a re'chakatsoahani gimin anga saksansa re'bana nangaiaha." Kristian :- "An'chingni noksul Jolani gimin na'a maikoba knabaa-chimma?" Bebegipa :- "Ua re'angpilani ja'mano noksulrang uko chonnike mitchiachim." Kristian :- "Na'a re'bana skang un baksa agangrikachimma?" Bebegipa :- "Salsao soroko anga uko grongachim, unon ua sorok nalsachi, ua dongnue, an'tangni kamnan kratchaa gita katdue chakaha. Anga Ka'dongagri a'belo gipubajaha aro apchongipa cholgugaona mamung kengnikoba grongbajaha. Indiba soroko, anga me'chik saksa, Dari ming-gipakosa grongskaachim. Ua angko rope, angna dongtoaniko ku'rachakachim. Indiba ua angko muni pina man'jana gita, anga mikrontangko mikchipaha. Ua angko chonnikoba anga uni kattarangko knatimgija ramatangko re'baaiaha. Kristian:-"Na'a maiba gipin kenaniko grongbaaha?"



Adam Bebegipako ruraa.

Bebegipa :- "Anga Neng'ani a'briona sokon, budepagipa saksa Adam minggipako anga grongaha. Ua Tol'napani songjinmao donga ine agana. Ua uni nokdangko man'rikchina ku'rachake, an'tang baksa dongchina aganachim. Ua mai dakgipa noko donga aro uni chakkolranga mai dakgiparang ong'a ine anga sing'on, Uni noko bang'a namnamarang gngang aro uni demechik sakgittaman uni chakkolrangde ong'jolaia ine ua angna aganaha. Uamangni bimungrangko :- Be'enni-Sika, Mikronni-Sika aro langgini-Gaora, ine minga." (I JOHN 2 : 16.) Anga uamang sakgittamkon, kimna sikode man'gen ine ua ku'rachakaha. Knachengon, anga uni agana gita dakna sikani gisik nabaachim, indiba ja'mano angni gisik dingtangatako man'aha. Anga uiaha je, anga un baksa dongna namnikode, ua angko nokkol palgenchim. Indake anga uko ang baksa agangrikna on'jaha ; maina anga uni nokchi re'chongmotjawachim. Unon ua angko sao on'e, angko duk on'china sakgipinko watatgen ine chinge aganaha. Indake anga uko wate re'na an'pilon, ua angko rim'tataha aro inditan angko

sakselaha ; maikai ua angko tong'tang tong'tang
ong'atginok ine anga chanchipilahachim. Anga
chrike inwataha, "Oh, anggita duk man'gipa!
(Rom. 7 : 24.) Anga neng'ani A'brini bijatchiona
sokon, aro uano niwilwalon, brani tang'baenga
gita ta'arakbee angko ja'rikbaengako niksoaha.
Anga bandasalona sokeon ua angko srapeaha aro
angni sambaona re'bekbae batsimitchi dokahaon
anga sia gita ong'pile gitilaha. Anga mikselbapilon,
"maina indita bilongbee angko na.a dokaha?" ine
anga uo sing'aha. Ua angna agane inaha. "Na'a
Adamko gisiko srik srik namnikani gimin."
ine agane changsatai angko bilongbee
doktaiaha aro anga nom'boke gitiltaiaha. Anga
mikselbataion uko mol'mole inaha, "O, angko
dokpanabeaha. Gipin mande uko dontongchina
ge'etjaode ua angko sipilen dokgenchimkon."



Ua mande angko srapea.

Kristian :- “Ua dontongchina ge’etgipa mandea sawachim?” Bebegipa :- “Nikchengon anga uko uijaha, indiba ua angko re’pakangon, anga uni jako gojalrangni a’kolrangko nikaha,

nrosa anga uko an'chingni Gitelanchim ine uirikaha."

Kristian :- Ua nang'ko rikbae srapegipara Mose ong'achim. Ua niam pe'giparangko pilak-koba kema ka'ja aro uo ka'sachakani dongja.



Chuonnikgija.

Kristian :- "Rasong Onani a'kaweo na'a sakoba grongbaachimma?" Bebegipa :- "Oe, anga Chuongnikgijako grongachim, aro uan angko pil'angna draataha. "Rasongna Onani a'kawea mamung namaan dongsrangja ine aganon, anga aganchakaha, "Rasongna bate Onanian nambata aro ga'akna skang gaora de'ani gisik" (Toe. 15 : 33, 16 : 18.) Nang'ni mande ra'ani ine agan-aniko anga am'ja. Anga giticham chasongni gisik gngangiparangni ku'pattianiko ra'gen." Kristian :- "Una agreba na'a sakgipinkoba grongbaachimma?" Bebegipa :- "Oe, anga Kratchaani minggipakoba grongbaachim. Anga uni ka'dongani mikkanggipa pilakkoba nikskakujachim. Uko bimung mingsretaha. Toromo ma'gapkame dongania ongiparangni aro chaugiparangni kamsan ong'aia, aro Salgini Songjinmaona songregiparang pilakan ongipa dolni manderangsan ong'bata ine ua aganachim. Uni chancniani gitade, kema bi'na aro on'pilskanara kratchaanisan ong'aia ine ua bebe ra'achim.

Kristian :- "Na'a una maiko aganchakskachim ? "

Bebegipa :- "Skangde anga mamungko aganchaknaba changjajok, indiba ja'mano kattarangko gisik ra'aha. "Mandeni gamchatnikania Isolni nikao chonnikani ong'a." (Luke 16: 15.) Indake anga una aganchakaha, "Isolni Songnokko man'na je mandean an'tangko goka daka, indakgipa mandean gisik gngangbatsranggipa ong'skaa. Anga Giteltangko wate nang'ko ja'rikode, Uni re'ba-pilani salo anga uko maikai nichakgen!" Indake agane anga uko wate git ring'e re'baaha. Unbak-saba, uamangni indake re'angmitingo, anga jumang nikaha; Bebegipa ramani samsachiko niatengachim. Ua Balwa minggipani re'baengako niksoaha. Bebegipa uona re'ange aganaha, "Ka'sara ripeng ; na'aba Salgini Songjinmaona re'engama?" Balwa aganchakaha, "Oe, anga unonan re'enga." Bebegipa :- "Indide re'baboda. An'ching damsan re'joljole angangriknadong."



Kristian Bebegipako ku'pattia.

Balwa baksa dikdiksa agangrike, ua Kristian-ona re'angpile srik srik ku'misichi aganaha, "Maironggipa namgipa re'ringipako an'ching man'aha!" Kristian aganchake inaha, "Ua an'chingni songjinmao donggipa mandean ong'a. Uni bimungko Balwa minga aro ua Ku'sik-Chi'gipani depante ong'a. Bol'bolgipa soroko donga. Ua

namnambea kattarangko aganna changa, indiba ua toromni gimin simsakja.” Bebegipa :- “Anga tol'mikako man'aha. Indide maikai an'ching uko gelna man'gen ? Na'a aganna amama ?”



Bebegipa aro Balwa ekgrika

Kristian :- “Atcha, angni ku’pattiako kna-
timbo. jringipa katta ja’pangrangni gimin na’a
un baksa agangrikbo, aro uarangni bebe chong’mot
ong’ama ba bol’bolanisanma unon na’a uko uigen.
Unon ua nang’na gisik nangjawa.

Unon Bebegipa Balwani sepangona re’ange
golpo ka’na a’bachenge aganaha, “Na’a da’o
maikai ong’enga ?” Bebegipa :- “Anga namenga.
An’ching da’onade bang’en golpo ka’manengginok-
chim ine anga chanchienga.” Bebegipa :- “Ia katta
bichongni gimin an’ching chanchigriknamo. Isolni
Ka’sachakaniko mandeni ka’tongo maikai mesoka?”
Balwa :- “Ian namgipa sing’ani ong’a. Isolni
ka’sachakania papni kosako bang’en namgija
aganani a’selko ong’ata.” Bebegipa :- “Ka’sachaka-
nia janggiko papna mitchiata inesa na’a aganna
nangachim.” Balwa :- “Maina, indide papni kosako
chrikani maia dingtanggrika ?”

Bebegipa :- “Bang’en dingtanggrika. Anga
manderangni papko matnange aganako gilja

nokrangni aganprakramrangoniko knaaha, indiba uamangni ka'tongode aro nokrangode srik srik papon kusi ong'skaa. Toromni gimin maio ong'a, uara kattaoma ba aganprakaosama, ba kamo ba bebeosama?" Iako knaon Balwani mikkang git-chakaha aro inaha, "Indagipa sing'anirangko na'a maina anggo sing'a?" Bebegipa :-"Na'a agangrikanikosan am'aiani gimin. Nang'nara chu ringa, mikboka, mikcheta aro torom, iarang pilakan aspan ong'aia." Balwa :-"Indide na'a angko chonniknasa miksonga aro angko namnikja. Nang'gita dakgipa mande ang baksa agangrikuaba kraja. Uni gimin nang'ko salam."



Uamang re'joljole agangrika.

Unon Kristian re'bae Bebegipana aganaha.
"Anga a'bachengon mai ong'gen, iani gimin

nang'na agansoaha. Nang'ni kattarang aro uni mikbokani nangrimnan man'jaha. Ua an'tangko namatana bate nang'ko wate re'angan nambata ine chanchiaia. Ua an'chingni uko gelna chanchina nangaoniko jokataha; maina an'chingni dolo uni dongpaania nidikani ong'ginokchim. Unbaksaba Paul indakeba aganaha, "Indakgiparangoni an'tangko gelbo." (1 Tim. 6 : 11.) Bebegipa :- Anga an'chingni un baksa golpo on'tisa ka'anina kusi ong'a. Anga kakketkon aganachim. Ua gisik pil'jaoba anga da'o matnangaoni jokaha." Kris-tian :- "Nang'ni una donnugija aganan namaha. Sakantian indakesa aganna nangachim, Manderang gisik nangna nanga, ong'jaode rongtalgiparang-mung ropoon suk ong'jawa.



Procharok mikkangchi kengnirangko agansoa.

Uamang indake bakrao agangrike re'angon
uamang kusi ong'achim. Ong'jaode ia a'biman-
duko re'anio namen neng'nikginokchim.

Uamang a' bimanduko re' badenasion, uamang nipiloa, saksa uamangni uigimin mandeni re' baeng-ako niksoaha. Ua mande srapna chel' engpition Kristian una inwate aganaha, "Ia angni ripeng, Procharok ong'a." Procharok :- "Na'simangna tom'tom ong' china!, angni ripengrang. An' chingni watgrikantal na'simang maikai ong' baaha?" Kristian aro Bebegipa, uamangna ramadilrango pilak ong' aranko una agane on'tokaha. Procharok :- "Na'simangko dake nianirangko na'simang grongahani gimin ong' ja, indiba uarang pilakkon na'simang ambagiparang ong' ahani giminsa anga kusi ong' chakaha. Cham' gija mukutko na'simangna donsoengaha. Uni gimin na'simang uko man' srangna gita re' angkubo. Na'simang ka' tongtang-tangko nibo. Agilsak aro Salgini bilrangan na'simangchipakan ong' enga. Kristian :- "Nang' ni didiatani kattarangna nang' ko mitela. Na'a an' tangan saksa Katchinikgipa aro skipragkipa ong' a ine chinga uia. Uni gimin mikkangchi dongsoenggipa neng' nikanirangko maikai amna man' gen indake na'a chingna ku' pattipabo."



Songregiparangna jajaani ong:kata.

Procharok :- "Angni depanterang, pilak
ruraanirangko aro dukrangko chakchikesa Isolni

Songnoko napna nanga ine na'simang knaman'aha (Wat. 14 : 22.) Da'o na'simang ia a'bimanduko batnasienga. Unon na'simang songjinmao napegen. Uano bobilrang na'simangko so'otna jotton ka'gen. Na'simangoni sakgnian ba saksade an'chichi sakki on'na nanggen. Indiba siaona kingking kakketgipa ong'bo, aro unon Janggini mukutko Raja na'simangna on'gen.

Anga Jumango nikaha, uamang a'bimanduko batsote Ong'gramaiani songjinmaona sokeaha. Ia songjinmao Ong'gramaoni Antiko cha'acchim. Ong'grammaiani Anti gital ong'jajok. Bang'a salrang re'angaha, Beelzebub, Apollyon aro Legion, iamang sakgittam ia Antiko cha'dilchengaha; maina Isolni Songjinmaona songregiparang iagitan re'pakronga ine nike iano uamang a'gilsakni rasong aro kusi ong'aniko palna gita pangkamgipa Antiko kuliaha.

Songregiparang ua antiona napbaon manderang jikjakaha, jajaani aro bilding bildang

ong'anirang ong'katbaaha. Songregiparangni ganding chindingrang ia songjinmani gita ong'jachim. Sakantian ia songregiparangko gokarang, ong'jaode paglarang ine nitatachim. Songregiparang Kanan ku'sikko aganachim, indiba uamangara ia a'gilsakni manderangna skia man'gijagiparang gita nikskaachim aro uamang antio palna re'bagipa bosturangko gamchatnikjachim. Badinggiparang uamangko brechina okamon songregiparang jaktangtango nachikolrango rim'penge, Indake aganachim," "Ong'gramaiarangko nikon angni mikronrangko an'pilatbo."




Uamangko rim'e sing'a.

Badinggiparangoni saksa agittal bewalrangko name nie, ka'dingsteke uamangko sing'e inaha. "Na'simang maikosa bregen, angna aganbo." Songregiparang mikchikkime uko nitate aganaha, "Chinga Bebekosa bregen." Indake aganon ua badinggipa songregiparangko mitchibat-oroaha.

Sorokrango bang'en golmalrang aro bilding bildang ong'anirang ong'katroroaha aro jinmarang saigiparangko saina aro chonnikna a'bachengaha. Mitamrang uamangna ka'dingstekaha, Mitamrang uamangko dokchina didiaha. Ia koborrrang ja'mano antini skotongona sokbaaha. Indake Kristian aro Bebegipako name sing'e nina gita rim'aha. Uamangni sing'anirangna aganchakani gita uamang aganaha, "Ia jolni a'gilsako chinga agittalrang ong'a. Chinga chingni a'songtang Jerusalemonasa re'enga." Uamang paglarang ong'jaode miksongen golmalrangko ong'atenga ine bichal ka'giparang chanchie, uamangko bilongbee dokenba a'mitekchi nongnongaha, aro jinmani nikrangrao kachao

chipe donaha. Uano uamang jinmani chonnikako
man'e, pilakni ganggopanikoba man'pajachim.
Antini skotonggipa uamangni duk ong'beako nie
gam'e ka'dinggakake roengachim.

Pilak obostarangoba uamang tom'tom chak-
chike dongaha aro namgijana namako aro duk
on'anina ka'saaniko on'skaaha. Antini mitam
namkalgiparang gipinrangni agrepile songregipa-
rangko dakanina manengpilachim. Unon uamang
ka'onange dolgnini gisepon dakgrikani ong'kat-
pilahachim.



Kristian aro Babegipa golmalko ong'katata
ine matnangako man'a.

Kristian aro Bebagipa inditan gisik gnange dakaha aro pilak chonnikanirangko sontolbee chakchikaha; maikai bang'a uano dongpagipa manderangkon an'tangtanchina salbanan man-pilachim. Dol gipin uani gimin inditan ka'onang-batsrangaha; maikai uamangko bakbak so'otna nanga ine badipilaha. Indake uamangko bichal ka'ani tarikko tik ka'ataha.

Uamang Namako-Mitchia minggipa bichal ka'gipani mikkangona bichalna ra'baako man'aha. Uamangni kosako matnanganiara indake ong'achim, "la' manderang badingani bobilrang aro tom'tomako golmal ka'giparang ong'a. Uamang manderangni gisepo dolrangko dakate, rajani niamko pe'na kengnigipa bewalrangko bang'akon ra'bae uamangni dolona chapata."

Indiba Bebegipa chakate an'tangna ka'donge warachakaha. "An'ching pilakni kosako donggipani niamko warachakgipa pilaknan warachake chadenga. Na'simangni agangipa raja uan Satan aro uan Gitelni bobil ong'a. Anga uko aro pilak uko ja'rikgiparangko warachaka."



Sakgittam sakkirang.

Bichal kagipa, Namana-Mitchigipa agane
inaha, “Jerangan koedirangni kosako matnangani
ngang, indakgiparang ong'katbae, chadenge●

on'echina." Unon Mikbokani. Kenchipchipani aro Mingsingana-Okkriani, iamang sakgittam manderang sakki on'a ong'katbaaha. Uamangni matnangani indake ong'achim je, Ong'gramaiani antio Kristian Torom aro Gong'gramaiani anti apsan ong'na man'ja ine uamang aganpraka aro badingani kamrangko gimaatna daka aro uamangni raja satanko warachake aganpraka."

Indiba Bebegipa ka'donge chakate warachake inaha, "Chingko tol'e matnangaha. Anga indakesan aganaia, chong'motan Isolni kattako warachakgipa pilakan Kristoni gisikko warachaka aro Isolko olakina rongtala bebera'aniko nangun, anga indakesan aganaia je, ia songjinmani raja aro uko ja'rikkiparang iano dongana bate norokosa dongna krabata. Isol angna ka'sachakchina."



Dosi ghang ine rae on'a.

Bebegipako dosi ghang ine sastina galgenma
ba ua dosi gri ine watgenma, tik ka'china bichal

ka'gipa Jurya hukum on'aha. Jurya member-
ranga iamang ong'achim; Mikgri, Nama-gri,
Denggu, Namgijana - Sikani, Namgijao - Janggi-
Tangani, Chalaki, Gaora, Miknengani, Tol'a,
Ka'namgija, Seng'ako-mitchia aro Nangrimgija,
iamangan Jurya memberrang ong'achim. Ua-
mangde sakprakan ka'tongtangtange Bebegipani
kosako bichal ka'e, raeko on'mansotokahachim.
Indake uamang chanchigrikaniko bakbakan mat-
chotate, dosi gnang aro uko bolo katate so'ani
sastiko on'na nanga ine raeko on'aha.



Uamang Bebegipako bolo katate so'a.

Bichal ka'gipa Namana-mitchigipa, Bebegipa-ko da'o ka'saningjabatsranggipa so'otaniona, a'songni niam gita, so'otram biapona ra'angchina hukumko on'ataha. Indake Bebegipa krongo katatako man'e ua tappa changpile so'ako man'aha.

Indake Bebegipani obosta bon'chotaona sokaha. Unon anga jumango nikaha je, Bebegipako wa'alo so'otani bak jamanon uni janggiko Aram-joljol Salgini Songjinmaona sa'grerang rimangaha. Kristiankode patok nokonan ra'angpile chipe donkuaha. Isol jean pilakni kosako sason ka'a, uni bilchi Kristian jokatako man'e, ua patokoni joke ramatangkon re'angtaiaha. Ua re'ao, ua saksan ong'jachim ; maina saksa uko ja'rikangaha--uni bimumngkoKa'dongsoani ine mingachim. Ua song-regiparangni namgipa dakbewalrang uni gisikko nangatbeaha aro ua indake uamangko ja'rikpana gisik nangachim. Indake uamang sakgni Salgini ramako damsna re'na ku'rachakgrikaha. Ka'dong-

soani Kristianna indake aganengachim, chong motan
Ong gramaiani Antidamoni manderang bang'an
salsao uamangko ja'rikgagen.



Songregiparang Ku'sik-gniko gronga.

Songregiparang antidamoni re'ongkatangon,
uamang saksa, uamangni mikkang mikkang re'ang-

engako nikahaha. Indake uamang uko srapeaha aro ua baoni re'bae batchina re'a ine sing'on, ua aganchakaha, "Anga Ku'sikgni minggipa songoni re'bae Salgini songjinmaona re'enga." Indiba ua bimumgtangkode aganjachim. Indiba ua Ku'sik-gni songo songdonggipa mingsinggiparang aroba man'e cha'giparang uni bakdrangan ong'toka ine dabina ua gualjachim. Ua mande indake aganaha, "An'ching chonchongipa minggniosan dingtang-grikaia. Chinga balwa aro chipakkoreko warachake re'ja aro chingna maiba namgni ong'osa toromko ra'aia."

Kristian unon uni bimumgko chanchichipna man'aha aro indake ua inaha, "Nang'ko Lapna-Ka'saani ine mingjama?" Lapna-Ka'saani :- "Uan angni bimumg chong'motde ong'jachim, indiba angko namnikgijagiparangsa angko indake mingkalaka. Na'simang angko damsan rimpaode anga namgipa re'rimgiparanko man'pagenchim." Kristian :- "Na'a ching baksa re'ode balwa aro chipakkorekoba re'pretna nangen aro na'a

toromko namani aro namgijani salrangoba ra'na nanggen."

Lapna-Ka'saani uamangni kattarangko ra-chakna man'jahaon, songregiparang uko gale katangaha, Uamang uko gale re'angon, uko sakgittam manderang srape, apsan ong'eaha. Uamangni bimungrang, A'gilsakko Rim'gipa, Tangkana-Ka'sagipa aro Pilakkon-Jokata mingachim. Uamang saksa sakgipinko mitelmika kattarangchi salam ka'grikaha. Ia sakbri ripengranga Rim'ketani skulo poraigipa chatrorang ong'achim aro chusokgipa ong'nara bilko jakkalachi, tol'achi aro toromni dakmikachisa ong'na man'iaia ine skiachim.



Lapna-Ka'saani aro uní ripengrang songre-
giparangni gimin agangrika.

Lapna-Ka'saani, Kristian aro Ka'dongsoani
gimin uni ripengrang baksa golpo ka'engachim aro

indake uamangni kosako aganaha, "Songregiparang somoini dingtangani gita an'tangko dingtangatna uija. Uamang balwa aro chipakkorerang maikai re'enga, uaragnaba sengja, indiba je rokomba, sin'a ba ding'a re'aia" Isolna uamang je rokom kenanikoba draaia. Anga an'tangde gamtangko janggitangko jokatnasa simsakchenga. Janggitangna aro gamtangna mamung gimaani dongjawa ine nikosa angade toromko ra'aia."

Uamang da'o songregiparangni sambaona re'ange indake sing'aha, "Chanchichipe, mande janggi tangao dal'na aro chuna chol ong'on, uko man'na gita toromi dakmike mesokna nangchongmota. Indake dakon ua chusokgipa ong'jaode, indakgipako namgipa mingna man'ama?" Kristian:- "Toromo donggipa bi'sa bebeba indakgipa hajal sing'anirangko man'aigenchim. Kristoko cha-aninasan ja'rikna niam dongjaode, batesa a'gilsakni man'dapgniko man'nade toromi dakmikara baditan mitchiani ong'batsrangaia !" lako knaon uamang saksa sakgipinchiko nitatgrike Kristianna aganchakna amjajok. Indake songregiparang uamangko wate re'badeangaha. Unon Kristian uni re'rim-

gipana agane inaha, "la manderang manderangni
bichalon chadengna man'jaode, uamang lsolni
bichalode maikai daksranggen !"



Demas aro man'dapani A'bri.

Kristian aro Ka'dongsoani, ua sakbri man-derangko watange, Man'dapani A'bri minggipa rupani a'kolona sokeaha. Rama sambao, Demas minggipa mande saksa (II TIM. 4 : 10.) chadenge dongengachim. Ua songregiparangko nikate indake okamaha, "lachi an'pilbabo, anga na'simangna maikoba mesokgen." Indiba Lapna-Ka'saani aro uni ripengrang Demasona re'ange, ramao uamangko niktaijajok.

Unon anga nikaha, songregiparang ge'sa giticham gisik ra'na songdongipa nikronggijagipa rong'doko nikeaha. Uanona re'bae, uara me'chikni bimang gita dakachim ine nikaha, giticham oikorrangchi seanirang uano g nangchim. Ua seako indake poraia, "Lotni jikgipako gisik ra'bo." lako poraie uamang indake uiaha je, Uan Lotni jikgipani karini krong pil'ako mesokachim; maina ua Sodom songjinmaoni katbamitingo an'tangni gamrang aro suk ong'e janggi tanganiko mikboke nipilatachim.




Songregiparang an'senggipa Chibimaona
re'baa.

Anga songregiparangni an'senggipa Chibi-
maona sokeako nikaha. Uamangni ramara chibima
rikam joljol dakani gimin, Kristian aro uni re-
ringgipa ua ramako kusi ong'e re'angaha. Chibimani
chiko uamang ringaha aro rokom rokom biterang-
koba cha'e similgipa bibalrangni samsirango
mamung kenani gri tusiaha.

Uamang ia an'senggipa biapko wate ga'nang-
gijagipa ramako re'taina duk ong'engachim; maina
uamang chel'e ramako re'baahani gimin uamangni
ja'arang saachim aro indake uamang ga'nanggija
ramako re'taiana bate namkala ramako re'na
sikbatachim. Uamangni mikkango, jakasichipak,
Dakdapgipa-Ramani-Samsi minggipa samsigrim gita
ua ramara dakangachim. Uamang uko re'na
sikon dontongna man'jajok; maina ua ramara
uamangna re'na nengraachim. Uamang ua ramako
re'tobee re'angon, mande saksa Ka'donggramaiako
grongaha. Ia raman uamangko Salgini songjinma-
ona dilgen ine ua mande aganani gimin uamang
ukon re'angaha. Indiba da'nang! walbaengaha


aro salgirang andalbaengaha. Ka'donggramaia
mikkang mikkang re'e, rama brange, tu'begipa
kolduchi ga'akonange siaha.



Balmikkao gimaa.

Songregiparang Ka'donggramaiako okamon, uni ku'chakako knaani pal ma'amani ku'rangkosa knasoskaengachim. Unon mikka wana aro kimpretna a'bachengbaaha. Ripraparang ching'brapaha aro kenbegni ong'achim. Chirang ta'raken dal'dobaaha. Indake uamang re'pilana bate ramaoni re'sretnan nambata ine nikaha. Unon uamang jamdap ge'sao nape chakon, asongoa, neng'beahani gimin bakan tusingaha.

Jamdapni sepango ge'sa Kenchakani Nok minggipa dal'gipa nok gnangchim aro uara Jajrengani skalni nok ong'achim. Pringo, ua samsigrimo rojojomingo, Kristian aro Ka'dongsoani uni a'kingo tusingako nikdateaha. Ka'saninggijani ku'rangchi ua uamangko de'mesaaha. Ua skal uni a'kingo uamang maiko dakengachim ine sing'aha. Uamang an'tangtangko sakgni songregiparang, rama brangaha ine aganchakaha. Unon ua skal uamangko uni a'kingo indake hukum gri napdrahani gimin rim'e, Kenchakani Nokni patoko chipchange doneaha.



Uamangko patoko chipchange dona.

Ua skal uamangko patoko chipchange sal
gittam aro walgittam mamung cha'ani aro ringani

gri donaha, aro balwa seenggiarangko rang'site, rong'terango uamang tusina nangachim. Watpiltaina mamung ka'dongani donggijako nike uamang jajrengbena a'bachengaha.

Jajrengani skal tuna re'angon, uni jikgipa Nangrimgija (Ka'donggija) mingipana sakgni manderangko, uni a'kingo hukum gri napani gimin, rim'e, patoko chipchange donako aganeng-achim. Uni jikgipa knatime, uamangko mamung ka'sachakani gri bilongbee dokchina ku'pattiaha.

Pring gipino Jajrengani Skal patokona re'ange, inditan bilongbee dokaha; maikai agre saknaahani gimin uamang siksak il'engnan man'pil-jajok. Indiba uamang mamung aganchakani gri dukko chakchikaha. Unon pringo uni jikgipa Ka'donggija koedirangko tangenga ine knaenba, uamang an'tangtangan so'ote sichina drachina ku'pattitaiaha. Uni ku'pattia gita, Jajrengani Skal, uamang tange jokpiljawahani gimin an'tangtang so'ote sichina' uamangko ge'etaha. Indiba Kristian

aro Ka'dongsoa antangtango ka'dimeatgrike,
salgipinoba indakgipa namgija obostaon dongkuaha.



Kristian aro Ka'dongsoa an'tangtango ka'dimeata.

Ka'donggija uni segipako indake ku'pattiaha je, ua koedirangko rimongkatange, uni a'kingo napdragiparangni skobikrokrang aro grengrangko, rimongkatange mesokechina ku'pattitaiaha Koedirang ia misilbegipa nikanirangko nikon kengokbeaha. Indake Jajrengani Skal uamangko patok nokonan rimangpile chipchange donetaiaha. Uni Jikgipa baksa chanchigriktaion, uni jikgipa indake aganaha, "Haida uamango chabi dongakon ine chanchichipna kraa aro uchin uamang joke katna ka'dongenga gita nika." "Knal pringo anga uamangoniko am'e nigen." ine segipa aganengachim.

Patok noko Kristian rang'gitik inwate inaha, "Da'osa, angon chabi ge'sa dongachim ine anga gisik ra'aha. Haida uachin je rokom talarangkoba ia Kenchakani nokniko kulina man'genma man'jawama nina nanggen." "Atcha namjok. Hai re'ongkate kulie niboching." ine Ka'dongsoa aganaha.

Kristian patokni talako kulie nion, uko nengraen kulina man'achim. Indake Kristian aro Ka'dongsoa ga'chekchome, ong'kate re'angaha. Indiba uamang nikaha je, dal'gipa silgrakni do'gacholona sokon, uko ona neng'beachim. Jenten uko ona man'on, ua inditan gam'ania Skalko mikrakataha.

Gam'ako knaarion Skal bilwatoa, uni ja'arang be'krope, siboke gitilaha aro indake uamangko rikangna man'ajajok. Ua sakgni songregiparang jokange, Rajani ramadilonan sokangpiltaiaha, aro mamung kenani uamangna dongjajok.



Skal rikangna man'jao songregiparang joka,

Ua dal'gipa silgrakni do'gako oe ong'kat-
angani bakan uamang Rajani ramaona sokpiltaion
ia songregiparang Jajrengani Skaloni jokani cholko
dakna chanchiaha. Uamang krong ge'sako
songdoe uano indake see donaha, "lan Kenchakani
Skalni nokona rama ong'a. Ia Skal Gitelko mit-
chia aro uni rongtalgipa songregiparangko so'otna
am'a."

Indake songregiparang Niwattoa A'briana
sokangaona kingking re'angkuaha. Uan Nitoa
minggipa nokara Gitelnin ong'achim. Uamang
uano baganni nitoarangoni ning'o jajrengani gri
re'rore roaha, aro cha'togipa biterangko cha'e
kusi ong'aha.

A'brini ku'choto Mes Nirikgiparang mes
jakrangko nirikengachim. Uamangko Uiani, Gisik-
Gnangani, Mikrakani aro Gisik-Nangani ine minga-
chim. Songregiparang ia abrini gimin uina am'aha
aro antangtangni ramao re'grongbagiminrangni
gimin Mes Nirikgiparangna agane on'tokaha.
Unon Mes Nirikgiparang uamangko jako rim'e

salam ka'e an'tangtangni tambuona rimangaha,
Uamangna cha'ani ringaniko on'manoa, uamang
baksa dikdiksa ia Niwattogipa A'brio dongkuchina
aganaha.



Uamang sakbri Mes Nirikgiparangko gronga

Pring gipino Mes Nirikgiparang umangko a'bri rona rimangaha. Uamang a'kimbri damsa Ja'guani mingipaona sokkujana kingking samba ketchi nitoarangko re'pretangaha. Uamang sokmano, nionaton, ia a'bri oni ga'akonange bnekatako man'e sigiparangni grengrangko nikatengachim. "larang maiko miksonga?" ine Kristian sing'on, uamang indake aganchakaha, "la greng-ranga bebeoni an'pilgiparang a'kimbrioni ga'akone sigiparangni ong'a." Unoni Mes Nirikgiparang uamangko Simsakatani minggipa gipin a'kimbriona rimangtaiaha. Unoni uamang chel'beao adita bang'a manderang mikgri ong'e goprangrang re'joengako nikatengachim. "lan maiko miksonga?" ine Kristian sing'aha



Simsakatani a'kimbrioni nikata.

Uamang aganchake inaha, “Ua samsigrim sambao jang'ki dakgipako nikatama? Ua jang'ki gitan manderang Kenchakani Nokona re'angna man'a. Da'o na'simangni nikatgipa manderang songrena re'chakaton, Rajani rama namjabea ine

chanchie, ua samsigrimni rama namgipa gita re'sretange, Jajrengani Skalni rim'e ra'angako man'e, uamangni mikronrangko ote uamang da'o gopramrango rejojotokenga."

Unon Mes Nirikgiparang uamangko a'brini ja'paona rimonangaha. Unon uamang songregiparangko neuatchina ge'etaha. Uamang uano andalbegipa a'kolko nikatengachim. Uanoni balminduri gita wal'kuni aramrang aro wal'birangni gam'baako knasoengachim. Uaranga gon'dokni bibarangko tang'dobaatengachim, aroba tengtoenggipa manderangni chrikani ku'rangrang ong'katbaengachim. Kristian sing'e inaha, "lara maiko miksonga?" Mes Nirikgiparang agane inaha, "lan cha'chipilgiparangni do'gachol ong'a-Norokona danok ong'a." Unon songregiparang re'taina bi'aha. Indake uamang Mes Nikrikgiparang baksa chugipa a'biding damsia Grika minggipaona re'angaha. Uanona sokeon Mes Nirikgiparang indake aganaha, "Na'simang namnikode chingni durbinchi Salgini Songjinmako niatna man'gen." Indake songregiparang durbinchi niatna jotton ka'on, uamangni jakrang til'tilani gimin namede

nikatna man'jachim. Indimangba uamang Salgini
Songjinmani do'gacholko aro ua biapni rasongko
aiao inmanpile nikataha.



Mes Nirikgiparang skiate salam ka'a.

Songregiparang re'taina skang, uamangoni saksu uamangna map kingsako on'ataha. Sakgipin, ropgiparangna simsakataha. Sakgipin, Muni Piani a'kingo tusijachina mikrakataha aro brigipa uamangko Isolni ganggopani ning'o dilangchina pattiataha.

Unon anga sakgni songregiparangni a'briko ong'onangako nikrikengachim. A'brini ja'pani jakasichi Togiani minggipa A'songoni dakbagipa, gonggegipa sorok, uamangni ramaon chu'grongechim. Uano uamang saksu bi'sa, Goka minggipako grongaha. Uara ua a'songonin ong'achim. Ua pante bi'sa bebekon uigijagipasa ong'achim, indiba ua pilakkon uigipa ong'a ine an'tangko chanchiachim. Kristian aro Ka'dongsoa, una magnasa bebeko uiatna jotton ka'aha, indiba ua bi'sa uijachim. Indimangba ua pante bi'sa uamangko ja'rikanguachim.

Dikdiksani ja'mano ua songregiparang andalgipa sorok chongipaona sokeoa, uamang

uano saksa mandeko budu dingsnichi kakomtote,
a'kol tu'begipani ku'mangona ripee ra'baako
nikaha. Uko An'pilgipa mingachim aro ua
Pil'angani minggipa songjinmao songdonggipa
ong'achim. Ia ong'ako nikon Kristian aro
Ka'dongsoa sakgnian be'en mona a'bachengaha.
Uamang re'angkuon saksa Ka'dongbregija minggipa
bi'sako chaugiparang, Kenrakgipa, Kakketgijagipa
aro Dosi-Gnang, iamang sakgittamchi chagropako
man'e, Nama Pangchakani minggipa mandeni
re'baesa uamang kene katangtokaha.

Indake uamang re'angkuon, rama dinggni
pekwatgipaona sokkujana kingking Goka uamang-
ko ja'rikangengachim. Ua pekwatgipa dilgniona
sokon, bagita re'gen ine uamang jajaaha. Uamang
jajae dongmitingo, saksa ba'ra bokako ganggipa
uamangona re'bae maina chadenge dongenga ine
sing'eaha. Uamang a'selko aganon ua aganaha,
"Angaba Salgini songjinmaonan re'enga. Ang
baksa re'bapabo."

Uamang indake uko ja'rikangon, uni base-
gipa ramara Salgini Songjinmaona mikkange
re'jachim, indiba bikpile janggalatesa re'skaachim.
Songregiparang iako uina skangan, ua uamangko
chek ning'ona rimnape donoa uamang cheko
ke'aha, aro maiko dakna nanga ukon uijaha.



Uamang cheko ke'a.

Iako dakman'on uni ba'ra bokako gangipaba ga'akaha. Unon uamang ropako man'aha ine unosa uiaha. Uamang chekoni jokna man'jaengachim. Unon uamang uano grapna a'bachengaha. Kristian Ka'dongsoana indake aganaha, "Mes Nirikgiparang an'chingko ropgiparangna simsakchina mikrakatjachimma ? Gisik gnanggipa mandeni aganara bebe ong'a ine da'o mesokaha, jekai, "Songsulko tol'pnikgipa mande una chakko badala." (Toe, 29 : 5.)

Indake uamang cheko nange ruuten dongani ja'mano, saksa Ching'gipa uamangona re'baengako niksoaha. Ua sokbae, chekko chitprake uamangko wataha aro uamangna agane inaha, "Na'simangni ja'rikgipapa mandeara ropgipa mandesa ong'achim aro ua an'tangko seng'ani sa'gre gita dakjeaha." (II Kor. 11 : 13, 14.)

Unon Ching'gipa uamangko tupeldapchina ge'etaha aro uamangko mikkang salrango sretjachina gita bilongbee dokaha aro ua indake agane ku'pattiaha, "Da'o angko ja'rikgabo, anga na'simangna rama chong'motko mesokpiltaigen."



Torom-gri.

Uamang re'angon, rama gita saksa mande
uamangona tongtong re'baengako niksoaha. Ua
mandeko Torom-gri mingachim. Ua uamangko
srapeoa ua sing'e inaha, "Nasimang batchina

re'enga ?" Kristian aganchake inaha, "Zionni A'briona !" Unon Torom-gri ka'dinge aganaha, "Na'simangni jumang nikgipa, indakgipa biap dongja." Kristian una aganachake inaha, "Re'bagnigipa A'gilsako indakgipa biap gnanng." Torom-gri agantaie inaha, "Indakgipa a'songko anga ruutaonintalan am'engachim, indiba uko da'alona kingkingba angade man'kuja Anga je namgipa bosturangko galpilen uko am'na re'bachim, uko man'jahani gimin, da'o uchinan re'pilengjok."

Ia mande da'ororo chasongni bewalrangchi kana ong'atako man'aha ine uamang uiaha. Indake uamang uko watange ramatangtangko re'anguaha.

Re'angon uamang Muni-pigipa a'kingona sokeaha. Uano balwarang jrimani gimin Ka'dongsoa mikilrang jrimet usina sikengachim, aro indake ua uano dikdikisa tusikuna janapengachim. Indiba Kristian uko Mes Nirikgiparangi mikraktaha gita tusina nangja ine agane, uamang Isolni uamangko

mikrakate donani gimin golpo ka'angskaaha.
Uamang Gokani uamangko ja'rikbaengako nike,
uko aganataha, "Bakbak re'babo. Na'a maina
ja'man chakenga?"



Isolni Katta indake agana ..."

Goka :- "Anga saksan re'na namnikbata."

Kristian :- "Na'a Isolni gimin maiko chanchia?" Goka :- "Anga Isolni niamrang gita name janggi tangaha aro nama chanchiani aro ka'tongba ang'o g'ngang." Kristian :- "Isolni katta indake agana, "Saksaba kakketgipa dongja, ong'ja, saksaba gri, (Rom. 3 : 10) Na'a Kristoni rongtalani gimin aro bebe ra'achi jokatako man'ani gimin uiama? lanan nang'ko Goka minga."

Goka :- "Angni ka'tong namja ine anga bebe ra'ja. Nang'ni bebe ra'ania angni ong'skaja, indiba angni bebe ra'aniba nang'ni bebe ra'ani gitan ong'aia." Kristian :- "Pagipa Isolni parakatana agre pilakba Jisu Kristoko uija. Mikrakbo, na'a antangni chuonggijako chanchibo aro unon Gitel Jisuko gisik ra'bo. Unosan na'a uni rongtalanichi bichaloni jokatako man'aigen."

Goka :- "Na'simang agre ta'rake re'enga. Angade na'simangko srappaja. Na'simang re'ang-

soaibo, angade jamansa ja'rikangaiginok."

Muni-pigipa a'kingko batangman'on, uamang Beulah a'songona sokeaha. Uano balwarang simildingding dake balachim aro namen an'sengbeachim. Iano uamang do'drangni knatobee ring'arangko knae kusi ong'na man'achim aro bibalrangba balkorekkamaiachim. Iano waloba saloba sal teng'sukamaiachim.



Songjinmako talbate nikata.

Ianoni Salgini Songjinmako talbate nikatachim. Uamang ching'giparangni ia bario re'jojoe roarangko nikrongachim. Iano uamangna mamung neng'aniba dongja ; maina uano songregiparangni nanganirangna batpilen bosturang gngangchim.

Songjinmani sepangona re'bae nion, uko muktarang aroba gamchatgipa ro'onrangchisa rikaha ine nikatachim aro uni sorokrangko bringija sonarangchisa antokachim. Songjinmaoni tang'baenggipa ku'rangrangko indake knasoengachim, "Nibo ! Jokatani sokbara, Nibo ! uni boksis un baksan."


Uamang re'anguoa biterangni bariko nikaha. "Ia baria sani ?" ine songregiparang, chadenge dongenggipa Malio sing'on, ua aganchake inaha, "Ian Rajani bari ong'a aro iarangko Rajani kusi ong'anina aro songregiparangko dongtoatna dakaha."

Uamangko drakka bariona rimange drakka biterangko ake cha'china ge'etaha. Unikoa ua

Rajani roram biapona, bandasalona jerangon
Raja kusi ong'achim, uarangona rimange mesokaha
Uano uamang asonge tusiaha.

Unon anga nikaha, uamang tusiaoni mikrak-
taiaha, re'gniko re'angtaiaha. Indiba bringija sonani
songjinmao salni teng'chakani ua songjinmako
mikkim gngangataha; maikai uko mikronarichide
nichaknan mikdatdugapilachim.

Da'o songregiparangni aro Salgini songjin-
mani gisepo dilsa chibima dal'gipa gngangchim.
Uko batangna gita jal'ang dongjachim aro chiba
tu'beachim. Songregiparang iako nikon jajabeaha,
indiba uamangni re'ringiparang uamangna indake
aganaha, "Ia chibimako batgija na'simang Salgini
Songjinmani do'gacholona sokangna man'jawa."
Ia kattarangko manie, Kristian aro Ka'dongsoa
kenoba, be'en moe chibimaona ong'onangaha.



Uamang chibimaona ong'onanga.

Chibimani jatchimangona sokangon Kristian
sripangna a'bachenge chrikwate inaha, "Anga

chi tu'ao sripangenga aro chipakkorerang angni skoo satdapenga!" Ka'dongsoa aganchake inaha, "Kusi ang'bo, dada, anga a'ako ga'manenga aro uan mangraka." Kristian aganchake inaha, "Oh ripeng, Siani walrang angko bilgriataha. Anga dud aro bija bitchi jokgipa a'kingko nikjawa." Indake Kristian kengokengachim. Ua chio sripangengon, ua Salgini sonjinmao napjawaha ine kenengachim. Ua Ka'sachakani aro tom'tom ong'aniko gisik ra'e, agangriktaijawaha ine kengokengachim.

Ka'dongsoa Kristianni skoko chini kosako rakkina bil amadipet jotton ka'beaha, aro indake ua aganengachim, "Jisu Kristo nang'ko nama obostao rakkichong." Kristian ia kattarangko knaon, ka'dimeataniko man'taiaha. Indake sakgnian ka'dongbate batangkuengachim. Ka'sne ka'sne uamang mangrakgipa a'ako uamangni ja'arangchi ga'manengachim. Uamang chibimani nalsao Ching'giparangni uamangna sengsoengakoba nikatengachim.



Uamang joke, chibimani nalsachi sokanga.

Uamang chibimani nalsachim.

Ching'giparang uamangsokeon.


Ching'giparang uamangsokeon, indake agane salam

ka'soaha, "Chinga dangdike on'gipa sa'grerang, na'simangko dakchakna Gitelni watatako man'giparang!"

Unon anga jumango nikaha, Salgini Songjinmara a'brini kosako dongachim. Songregiparang Chinggipa sakgni sa'grerangni dakchakachi a'briko nengrae doangna man'aha.

Uamang do'gacholona sepanganon, jinma dolsa re'bae, uamangko grongna dongsoaha. Ching'giparang indake agane inaha, "la sakgni manderang a'gilsako dongmitingo Gitelna ka'sagiparang ong'aha aro Uni Rongtalgipa bimungna pilakkon watgalaha."

Rajani singga sigkiparangba uamangko grongna re'sobaaha aro uamangoni knatobee singga sikani ku'rangchi salgi gimikkon gamchakatengachim. Singga sigkiparang Kristian aro uni re'rimbagipako salam ka'soaha. Indake songregiparang cholgugaona sokeaha.



Enoch, Mose, aro Elijah.

Anga jumango nikaha, Ching'giparang uamangko do'gacholo okamchina aganon uamang

okamoa, Enoch, Mose aro Elijah songjinmani pakma kosakoni uamangko nionaton, uamang indake aganataha, "Sakgni songregiparang, Chingni Rajana ka'sani gimin songree ianona sokbaaha." Indake uamang certificaterangko on'ataha. Ua certificaterangko Rajana on'atoa, ua uarangko poraie aganataha, "Songregiparang da'o bao?" Uamang aganchake inaha, "Uamang a'palo chadengenga." Unon Raja do'gacholko ochina agane, uamangko rimnabachina hukum on'ataha.

Unon anga jumango nikaha, Kristian aro Ka'dongsoa do'gachol gita napangon, uamangni mikkang dingtang ong'aha aro uamangni ganding chindingrangba sonarang gita ching'pilachim. Unon Songjinmani pilak kantarangko doktokako anga knasoengachim, aro uamangna indake aganako anga knaaha, "Nasimangni Gitelni katchaaona napbabo!" Anga songregiparangni indine gam'e ring'engakoba knasoengachim, "Pattia, Mande ra'ani, Rasong aro Bil singhasono asonggipana aro Mes Bi'sana Jringjrotna ong'china." (Para. 5 : 15.).



Goka chibimako chobate re'baa.

Anga nipilon, Gokani chibimaona re'baako nikaha. Ua mamung neng'aniko man'jachim; maina Ka'dongarmaia minggipa an'tangniringchi uko chobatatachim.

Songregiparang gita, Gokaba a'briko doange do'gacholona sokeaha. Ua saksan uanona doangachim aro saksaba uko grongsojachim. Goka Songjinmani do'gacholko doktikon, Songjinmani pakmao nionsogiparang uko singe inaha, "Na'a baonni re'bara aro maiko nanga?" Ua aganchakaha," "Anga Raja baksa cha'aha aro ringaha, aro ua angna ramako skiaha." Unon uamang uni certificateko bi'oa ua an'tang ka'bakoniko rim'roke niaha, indiba man'jajok.



Goka kaako man'e galatako man'a.

(171)

Unon uamang Gokako kae, a'brini ketchio
donggipa a'kolko oe, uko a'kol ning'china galnap-
atataha. Unon anga nikaha je, Salgioni Noroko-
naba rama seng'sot gngangchim.


Anga mikrakoa uan jumangsachim ine
nikaha.


Ia jumangni golpo poraigiparangna mikgittal
ongchina !

Unon usmanq Gokoko kee, a prini ketchio
donggpa a'kolko oe uko a'kol ning china galap-
acatah. Unon anga mikaha je galgion Noroko-
naba rana seingot ganachin.

Anga mikakoa un jumanqachin je
mikaha

la jumanq golpo tuzigaranq mikicai
ongchin





31-

ACKNOWLEDGEMENT

We find no adequate word to express how much we are grateful to those whose efforts have succeeded in publishing this book for different tribal languages in North-east India churches. The Evangelical Literature Depot in Calcutta, and Mr. J. M. Chatterji in particular, who, recognising the great need in this region, took a keen interest in this project, kindly and readily consented to let us translate the book from Bengali into different tribal languages, and also provided the set of blocks for this book on loan.

We also express our appreciation for those who spent their tireless efforts in translating this book in respective tribal languages. But, on the other hand we also apologise to those whose translations were either corrected, or dropped because of differences in style and spelling of the languages. Thus, with these multifarious attempts, we publish this world known book in a condensed and pictorial form for you to read. We are hopeful that this pictorial form of the book will bring to you a better understanding and easier reading of the story of the pilgrim Christian.

— Publisher.

Published by

CHRISTIAN LITERATURE CENTRE.

Panbazar, Gauhati—1